

四庫全書

子部

欽定四庫全書

萬姓統譜卷五十六

明 凌迪知 撰

下平聲

十蒸

凌

河間徵音衛康叔子為周凌人以官為氏又望出渤海涿鹿

三凌操

餘杭人輕俠有膽氣孫策初興每從征伐常冠軍履鋒守永平長平治山越奸滑欲手及權統

事從討江夏入夏口先登破其前鋒輕身獨進為甘寧射死

凌統

字公績操子年十五拜別駕司馬行破賊都尉使攝父兵從征江夏斬黃祖將張碩盡獲人船

還軍兼道水陸並集時呂蒙敗黃祖水軍而統
先博其城於是大獲權以統為承烈都尉與周
瑜等拒破曹公於烏林遷校尉從征合肥為右
都督時魏將張遼等奄至津北統率親近三百
人陷圍扶杆權出統復還戰左右盡死身亦被
創殺數十人度權已免乃還橋敗路絕統被甲
潛行權既御船見之驚喜統痛親舊無反者悲
不自勝權引袂拭之謂曰公績亡者已矣苟使
卿在何患無人拜偏將軍統雖在軍旅親賢接
士輕財重義有國士之風過本縣步入寺門見
長吏恭敬盡禮親舊故人恩意益隆卒年四
十九權聞之哀不能自止使張承為作銘誄

凌烈

統子數歲時權給養于宮愛待于諸子同賓客
進見呼示之曰此吾虎子也長封亭侯弟封亦

統
兵

晉 凌嶠 諮議
參軍

隋 凌秀 著管絃
記十卷

凌恭 字遵德建昌人精通五經而埋名晦跡煬帝朝召為學士後至戶部尚書

唐 凌準

字宗一以孝弟聞于其鄉讀書為文章著漢後春秋二十餘萬言又註六經解韋人文集有謀

畧尚氣節調人之急出貨力循弃糶糶年二十以書干丞相試其文曰萬言擢為崇文館校書郎又以金吾兵曹為郊寧節度掌書記涇之亂以謀畫佐元戎常有大功累加大理評事御史賜緋魚袋轉殿中侍御史後為浙東廉使按驗汚吏吏人敬愛上召為翰林學士德宗崩議秘喪抗詞與語同列畫其不可者十六七乃以旦日發喪六師萬姓安其分入為尚書仍以文章

侍從由本官叅度支調發出納有方連累出知和州降連州居母喪不得歸二弟繼死不食哭

泣遂喪其明以歿柳宗元為銘其墓子南仲殷仲

凌敬

初臣于竇建德建德救王世充敬獻策請悉兵踰大行徇汾晉則鄭圓自解竇不從而敗見容

筆齊續

凌士燮

唐人柳子有贈凌助教蓬屋詩序云儒有蓬戶甕牖而自立者河間凌士燮窮討六籍而

為儒官

凌彩

準子迪功佐郎

凌誼

校書郎

宋

凌景陽

字少明餘杭人又云海寧人舉景佑二年進士授江陰主簿除廬州觀察使推官仕州縣

一十二年慶厯六年召為國子直講除吏部員外郎纔得館閣校勘皇祐初判尚書考功同知

太常少卿召為監察御史罷知泰州以集賢校理判開檢院戶部判官知曹州為開封府判官

復出為京東轉運使徙知兗亳二州又追坐為轉運時不能奉行法令黜監衡州鹽倉英宗即

位之初起知襄州人為祕書少監以疾求去拜工部侍郎兼中書舍人治平四年特除龍圖閣

直學士

凌景夏

字季文餘杭人紹興二年對策呂頤浩稱其詞勝張九成任紹興府觀察推官推祕書省

正字遷著作佐郎與館職吳玘朱松張廣常明范如圭等六人共奏封事言和議非便秦檜憾

之知外郎及閒居凡十餘年檜死除軍器監尋
除起居舍人兼署給事中言乞蠲免紹興二十
一年詔書減放臨安府和買絹二千六百餘疋
還中書舍人直龍圖閣知撫州知襄陽府知鼎
州奏乞放免程昌禹所增蔡州官兵衣糧六萬
四千餘緡徙宣州加集英殿修撰吏部侍郎

凌及

景夏子歷官同中書門下平章事

凌千秋

字國齡臨安人以父任補承務郎累官歷石
正言遷左司諫除監察御史徙太常少卿起

居郎拜御史中丞為太府少卿落職為右武大
夫平江刺史隨高宗南渡扈至瓜州督兵餽餉
預有其勞帝如臨安府紹興元年三月召加賜
中奉大夫贈禮部尚書工部侍郎賜地秀州華

亭縣

凌策

涇縣人字子奇登呂蒙正榜進士除大理寺評事通判舒州召為太子中允直集賢院歷三司

又除開封府通判再遷左正言出為淮南轉運副使遷尚書禮部員外郎擢知制誥太宗即位起遷本曹郎中權知三司使拜右諫議大夫改樞密直學士知洪州坐事奪職復樞密直學士知益州遷永興軍事除左諫議大夫兼三司使拜樞密副使遷吏部侍郎兼知諫院事公學博敏超絕一世真宗嘗言策治蜀敏而有斷王旦對曰策性質淳和臨事強濟真宗深然之

凌尚賢

餘杭人紹興中為司農卿

凌唐佐

新安人字公弼登元符三年進士授大名府司戶差知夏津縣河北有疑獄繫者二百人

歷十三年十置獄唐佐往決得其情人皆感泣是歲旱雨隨至時號縣令雨遷光祿宗正丞歷

京畿江東常平後知登聞檢院嘗語侵王黼請
祠得南京鴻慶宮薦除開封府司錄知嚴州號
令不繁暇日與諸生講學作易傳數萬言進之
建炎初提點京畿刑獄進直徽猷閣京畿寇盜
充斥與戰數十合殺傷過當三年授知應天府
敵騎數十萬圍城城中兵少糧乏外無援救誓
以死守及陷被執敵欲降之指頭曰此可斷不
可降也皆義之劉豫欲污以樞轄不從使留守
應天繼得豫虛實密以蠟封奏朝廷事泄捕至
大梁怒曰何為見賣唐佐曰國家何負於汝而
反面事敵一世皆欲殺爾何獨我也豫猶惜其
才繫累日度終不可屈遂引出害之臨死曰恨
不見梟劉豫之首明年諸將復穎昌妻田氏以
唐佐死狀聞詔贈待制敕奠衣冠於班正門外
學舍歲時奉祀

凌民瞻

吳人嘉祐進士民師熙寧進士子哲遵宣和進士孫揆建炎進士揆孫雲嘉定進士雲孫

萬頃開慶進士
一門科第之盛

凌哲

字明甫宣和中進士高宗朝自明州通判召對推為御史數日遷右正言初周望守平江金人

入寇望遁去以罪責死連州至是其家自陳詔復故官澤及其子哲因追數望弃城罪惡竟寢其命及上疏論秦氏親黨因緣科第有妨寒賤進取之路又奏王會前知湖明二州及移平江特權貪酷亡投竄遐裔以為慢令賊民之戒會竟編管循州遷左司諫吏部侍郎兼侍講以敷文閣待制知台州遂退歸鄉里十餘年以通議大夫致仕卒年八十六哲為人端重簡默澹約自守雖處侍從不啻寒素非時未嘗至郡府終歲無所干請居隣有茶肆日為市井俚俗所聚

哲徒避之人服其德
量目為凌佛子云

凌冲

吳人慶元進士少負才名受知王安石嘗著卿黨傳說二論安石大奇之熙寧間知含山縣律

己甚嚴一毫不妄取秩滿歸裝有一硯冲視之曰非吾來時之物也命還之

凌皓

天禧時知保昌縣興水利開導江水民感其德至今號曰凌江

凌浩

字真翁無錫人與同邑陳敏受業于吳安定之門以經術知名治平二年甲科令蓬萊武涉召

拜太學博士推安定之學以誨多士學者翕然師尊之

凌震

吳人策之後文天祥同時人端宗避兵海州震以都統復海州其後散居嶺南

凌琰

閩清人政和特科狀元

凌簡

襄陽人通判興化路軍事

凌岳

華亭人少習舉子業會宋亡遂不仕大肆力於詩駸尋十才子筆仗時推許之

凌萬頃

字叔度崑山人景定二年第四甲出身

凌伯玉

武進人政和進士

凌臯

吳興人熙寧進士

凌次英

高郵人紹興已未進士

凌似祖

建炎初建寧府觀察判官

凌大淵

於潛人淳祐進士有文學工詩年十九而卒娶劉氏已請期而大淵卒劉號慟告父母曰

兒聞女子以一志為良以死生不易為節兒已
許凌君固吾夫也兒將易服奔喪父母曰汝猶
木方芽又未嘗身踐其廐何遽若此泣曰以身
許人而背之乎有死而已父母從之於是羸衰
赴夫家臨柩伏哭盡哀終喪乞夫兄恭之子以
養為之娶至於抱孫白首不易其志寶祐間縣
令呂洗聞而嘉之為表其居曰烈女坊里人趙景
緯為作詩刻諸路傍

凌嵩

新城人嘉定
十三年進士

凌遂

武康人江
陰司戶

凌遠

江陰
司理

凌永仁

臨安人熙
寧進士

凌曷

從仕郎紹興十五年知涇縣

凌天鈞

涇縣人元祐三年李常榜進士

凌伯裕

政和中知柳州

凌雲鵬

策子光祿丞

凌魯

翰林學士

凌奎

祕書省正字

凌仁

吳人咸淳進士玉山令

凌戩

著作郎

凌遷

水部
主事

凌啟元

太平府
推官

凌闌

都官
郎

凌朝元

景陽子太
學博士

凌珩

大中
大夫

凌朴

於潛
丞

凌煜

太常
丞

凌洪

河東提點刑
獄贈尚書

凌尚賢

舉進士中書舍人

凌順

臨安簿

凌頤

宣議郎

凌邦

朝議郎

凌高

中大夫

凌允

工部尚書

凌雍

禮部尚書

凌愷

大理丞

凌怡

國子司業

凌棕

進士

凌嶽

錢塘丞

凌墀

兩浙轉運判官

凌文秀

承事郎

凌昉

光祿少卿

凌懋

廉訪使

凌循

國子博士

凌曙

給事中自雲鵬
以下俱準後

元
凌時中

安吉人字德庸始冠值宋末元將巴延命時
中招諭安吉武康德清故三邑之民賴以保

全授建昌路司獄有重囚待報將刑時中察其
冤白於上官不許即解印去又不許後罪人竟
獲於他郡因遂得釋累遷福建廉訪都水監丞
時河南王堰水轉磨民患之愬於朝命臺省按
治皆畏不敢言時中獨命毀之大長公主南遊
乘豪民巨船鉦鼓而行時中以為非法請更乘
驛嘆服官至秘書
少監吳興郡侯

凌緯

字景文昌化人號菊山篤學能文大德中以才
薦為雪江書院山長尋弃去嘗著唐山紀事董

子雅言壽考錄冰室集事偶韻語等書
年九十三卒邑令表之曰康德先生

凌懋翁

字師德時中子景定二年進士初知連州廣西蠻入寇懋翁率衆禦之寇望見駭曰此凌

知州也
不可犯
額手而退
招諭諸洞蠻酋悅服
至正甲申考兩浙鄉試號稱得人歷官翰林學

士通議大夫
秘書監致仕

凌雲標

南昌人至正
丙子舉人

凌師德

錢塘人至正間任嘉興府推官弟師節歷知府

凌攀

字彥冲錢塘人為常熟州學教授

明凌崇正

長垣人正統舉人任河南登封知縣以上北直隸

凌文

字從周上元人天順丁丑進士歷叅議

凌雲翰

上元人成化進士文子

凌譔

江寧人正德中任州判

凌輅

建甌人洪武乙丑進士歷漢陽知府五美樓其文章政事綽然著聲

凌汝祥

句容人家貧力耕養母母歿廬墓啜粥凡三年不反私室朝夕哀哭不輟永豐羅倫書慰

之知縣章廷圭作詩嘉其孝云

凌傳

句容人由舉人成化十七年知象山縣事能為民興利飭學宮新廨宇興廢舉墜百度維新築

岳頭陳堯二塘得田四十餘畝民多賴之又日進諸生講學論多所發明卒於官士民懷之為

立殯思碑建祠祀焉

凌諤

句容人弘治貢士任曲周縣丞以上應天府

凌注

清河人永樂中任按察使以上淮安府

凌遠

字季行鳳陽人薦四夷館繹字三年授冠帶後陞鴻臚寺序班取入直內閣

凌耀宗

臨淮人洪武初由秀才任中書舍人陞禮部員外郎侍經筵天順間預修大明一統志

凌英

字朝傑臨淮人正統舉人由大名府通判陞南昌府同知

凌本

字立之耀宗之子中弘治甲子科湖廣鄉試任六合縣學教諭改國子學正陞雲南府通判後

轉為嵩明州知州

凌雲

字光華臨淮人正統十一年貢授太平知縣

凌鵬

六合人永樂中內黃縣丞

凌錦

壽州人弘治中貢士

凌霄

潁上人正德中嘉興縣丞

凌朝

潁上人正德中陝西布政司理問

凌岐

字鳳止潁上人嘉靖中任訓導以上鳳陽府

凌相

字忠甫通州人弘治進士歷都察院都御史

凌楷

字端甫通州人任南京戶部主事改刑部轉戶部郎中累著能績尋居憂卒

凌昕

通州人嘉靖貢士為兵馬指揮

凌旭

凌東溪

凌東周

凌東漢

凌出

凌景

俱通州人
嘉靖貢士

凌佑

高郵人
洪熙貢士任通判

凌岱

儀真人
嘉靖貢士

凌玉

揚州人洪武初任青田令興學勸農民受其惠

凌濬

泰興人弘治八年潛江縣教諭

凌儒

字真卿泰州人嘉靖癸丑進士授永豐知縣選御史言事杖歸隆慶初起歷都察院右僉都御史

史

凌炅

通州人相子嘉靖中貢士任河南陳州判官

凌飛鸞

炅子嘉靖乙卯舉人

凌飛閣

炅子為廣東按察司經歷以上揚州府

凌璽

合肥人永樂中常德衛指揮以上廬州府

凌昌

宿松人以從事仕為江西布政司副理問每獄疑獄出人意表推監察御史剛正不阿改都察

院都事才名益著轉大理寺寺副明慎之才剖決曾不留滯大理至今稱之致仕歸貧甚尤以清苦自持不履公門者十年臺臣聞而重之低其家存問焉有問居官者昌復曰吾聞之諺云文官不要錢武官不怕死聞者壯之

凌昂

當塗人洪武舉人任開封府通判

凌璿

南陵人永樂中承天府推官

凌讓

當塗人洪武貢士任推官

凌舉

當塗人天順貢士任訓導以上太平府

凌琯

字惟和歙縣人嘉靖乙卯舉人壬戌進士任御史歷貴州提學副使子克倫癸酉舉人 以上

徽州府

凌餘慶

宣城人洪武癸酉以匠執役京師母家居病劇餘慶聞之憂甚夜即沐浴焚香告天到股

付餘慶妻兄楊某持歸其妻和粥以進母疾尋愈詔免餘慶本役仍旌表其門 以上寧國府

凌盛

字至善長洲人永樂中任教諭

凌信

吳縣人永樂中任太常少卿

凌玘

常熟人成化舉人任彭澤縣知縣

凌宗政

長洲人宣德中任教授

凌謙

太倉人永樂中任知縣

凌杞

字尚忠崑山人弘治舉人正德中任崇仁知縣屢征東鄉巨盜備嘗險苦

凌汝志

字雲鶴太倉人嘉靖甲辰進士歷應天府丞

凌雲翼

字汝成汝志弟嘉靖丁未進士歷總督軍務兵部左侍郎兼都察院右僉都御史陞南京

工部尚書

凌邦奇

字正伯崑山人嘉靖癸丑進士以上蘓州府

凌樞

江陰人景泰舉人以上常州府

凌鑒

鎮江人嘉靖貢士任龍南縣學訓導以上鎮江府俱南直隸

凌雲翰

字彥紳仁和人博通經史領至正十九年鄉薦洪武初舉杭庠訓導陞成都府學教授卒

所著有拓軒集藏于家

凌煜

仁和人景泰元年舉人

凌鳳

錢塘人成化七年舉人

凌德

仁和人弘治中任泰寧縣知縣

凌楫

錢塘人禮部祠祭司員外郎兼翰林院正字弘治庚戌廷試克彌封官

凌立

字子中錢塘人嘉靖癸丑進士授刑部主事歷江西建昌府立儀容俊偉才思英發任曹郎時

綽有聲稱知建昌聽斷明敏獄無冤滯屢首薦剡為同儕所擠落職歸田杜門教子謝絕請托

長子登名中隆慶庚午鄉試仲子登瀛同科解
元萬歷丁丑進士三子登第登俊皆負雋望

凌永 新城人永樂舉人任南雍府推官留心
刑獄詳審精當大著賢聲課令第一

凌觀 臨安人洪武
十八年貢士

凌鎬 新城人天順
庚辰進士

凌曄 新城人正統
十年貢士

凌志 新城人貢士永樂
中任湖廣叅議

凌雲鳳 新城人嘉靖中
任應天府教授

凌琛 海寧人永樂
五年貢士

凌雲

於潛人永樂七年貢士以上杭州府

凌悅

字孟傳安吉人至元登進士第有時名太祖召為捲簾使嘗稱曰老凌而不名累官都御史然性峭直每以戇諫忤上意竟以是疎之籍其家所著有六經疏議百卷

凌賢

字彥能其先安吉人懋翁四世孫祖壽遷歸安父均德有隱德不仕洪武戊辰膺浙江鄉薦歷應天府治中居官剛正不阿改知鄭尋又謫均時隆平侯張信禮科給事中胡濙自荆還薦當

大任宣皇帝作招隱歌命行人齋賜馳驛召還入見命進兵部尚書又命掌都察院事固辭上曰汝欲學疏廣耶朕遂汝高志御書賜老堂三字褒之楊東里士奇為記以子銜都察院右僉都御史致仕復馳驛還二子晏如坦如

凌晏如

字安然賢子業儒敦行精六書法尤工李斯大篆二王小楷永樂初徵授中書舍人文皇

帝臨中書省觀書衆皆惛慄迺獨意態安閒得晉人風味又嘗寓直召論事稱旨擢吏科給事中遷都給事中扈駕北征轉都察院右僉都御史賜之璽書蓋是時持憲者多以賄聞帝簡擇用公公感上知過確然自守不為衆所惑彈劾不避寮寀憚之與都御史顧佐齊名兵部以武職貼黃久不清請會官清理上以命公公與翰林侍讀苗衷同力一心罔有漏失有顏鎮撫既卒子孫當一人繼乃復以一人冒官三十餘年恃權貴莫敢誰何公閱其實乃奏罷之又着令武官有北平功而無子者不忍遽絕其祿得以壻或義兒一人不再及也有張指揮者既以義兒者繼矣又或冒及其子因有所調發託統師以疾豫以子代亦十餘年矣公亦奏請罷之其

剛直不阿類此公身居要津數令人抵家需產自給產幾盡及卒而子敷困無聊遂贅閔氏為壻從晟舍里遂為烏程人姪敷成化中歲貢任廣東市舶提舉死于賊難

凌敷

字達夫晏如季子贅居晟舍里遂為烏程人公豐順廣額性開朗尚義人稱長者郡中屢請鄉

飲不赴時舅氏莊懿閔公珪方在臺閭敷一無干請若與相頡頏者年八十八子三人雲震震字時章性至孝工詩母歿設帷帳伴父十餘年不倦信義聞于鄉閭皆稱仁厚震之子紳字子措疎通幹練所行多見信重三世皆隱德云指孫嗣音萬厯丙子舉人

凌震

敷季子字時東號練溪烏程人由歲貢授黔陽縣學訓導中丞鐵橋黃公督學少華許公重公

之學到官月餘即命提督寶山書院選拔名彥俾受學焉公入院嚴立科條陳說倫理之懿啟

迪性命之微一時士習改觀未幾遂請老以歸
歸即掃跡城府杜門自養圖書數卷疊疊不倦
興到則獨步林壑尋芳討勝風度悠然清修之
範近世罕聞與劉清惠孫太初為一時名交邵
守萬雲鵬高其行敦請鄉飲卒于嘉靖乙未春
壽六十五公生而穎異有俊才博綜羣籍曉析
百家善古文尤長於詩所著有練溪集行于世
邑人邵南狀公之行曰議論平正志行潔良因
而不失其亨窮而不失其達和而不隨高而不
亢清惠公銘其墓曰勛志矯矯懿行肫肫以位
則屈以道則信人服
其言今祀鄉賢祠

凌約言

字季默震第三子少有異才既承家學又從
施青陽先生侃游涉獵廣博網羅百家言試

必高等苦抱心疾不能終試由選貢中嘉靖庚
子應天鄉試授全椒知縣歷沔陽知州廬州府

同知南京刑部員外郎所在咸有政績性開爽
疎朗不為町畦瑣鄙之事與人和然其介有嶽
嶽不可奪者在廬時嘗受檄清理醴務宿弊為
洗採三殿花石以身先州邑吏而設法委曲處
之甫三月報完詔齎金帛加等有居閒而索金
於茶及酒者發之按如律豪猾惴惴受事有勢
權求郡縣賂不得輒加辱公獨義形于色其人
愧反加禮焉嘗曰即以請非義干進雖斫頭陷
胃弗為也以母老請告服除不復起隆慶初恩
詔進階朝列大夫年六十八卒所著有鳳笙閣
簡抄椒沔稿病稿偶錄見者無不推服云子迪
知嘉靖丙辰進士工部員外郎述知光祿寺監
事遇知國子生季子遂知字稚良清修好學綽
有聲稱年三十而卒家孫湛初字玄旻有雋才
尤工尺牘王中丞元美目為小
友年二十五而卒士林惜之

凌漢章

名雲以字行歸安人幼業儒遇異人精於明堂鍼灸泰王聘請治痿疾一投而愈贈詩以

餞其行有云尋常藥餌何曾效分寸鍼芒却奏功之句尋召入太醫院天下稱為神術疎財重

義凡所行之處遇有橋梁寺院塌損即坐數日求鍼謁賁者雲集即施與之尤之日家無餘貲

孫瑄字子完得祖真傳嘉靖間為太醫院吏目

凌旦

歸安人正德舉人任知縣子啟梧州府經歷

凌雲

烏程人永樂中留守司斷事

凌漢

武康人景泰中任南海知縣以上湖州府

凌寀

字熙載山陰人成化乙未進士任清流縣興學重農毀淫祠崇正道政治卓越徵書方下卒于

官民哀
慕焉

凌玉璣

山陰人成
化舉人

凌世華

山陰人嘉靖貢士
以上紹興府

凌澄

鄞縣人弘治十二年為興
山縣丞以上寧波府

凌奎

臨海人成化中為
瑞昌縣學教諭

凌瓚

臨海人正統中任
彭澤縣學訓導

凌友亮

天台人洪武初任吉水
縣知縣以上台州府

凌淳

金華人洪武中
任瑞安主簿

欽定四庫全書

萬姓統譜
卷五十六

十六

凌翰

金華人成化舉人
以上金華府

凌德茂

遂安人洪武
中任句容丞

凌文獻

遂安人正德中
任都勻府知府

凌文美

遂安人正德中
任京衛經歷

凌廷錫

遂安人嘉靖中任難澤縣訓
導以上處州府俱浙江

凌守誠

彭澤人洪武間人材任興化府倉副使倜儻
不羣以異行聞於上超陞金華府知府改廣

東韶州府感主上之知竭忠
貞之力一官二郡政績赫然

凌輝

德化人中書舍
人預修一統志

凌伯溫

浮梁人正統中任知縣

凌雲

彭澤人永樂十五年為河南都司

凌銘秀

永豐中洪武中任長汀縣知縣

凌璧

新淦人正德中任荊門州訓導

凌友寬

弋陽人成化中任連城知縣以上俱江西

凌輝

閩縣人永樂進士歷按察使

凌修德

福清人永樂舉人任南豐教諭

凌雲

閩縣人嘉靖中任荊門州學正以上俱福建

凌文質

建固始人洪武初知趙城縣重

凌漢

字斗南武原人洪武十七年以秀才舉至京獻烏鵲論上喜之擢司經局正字未幾出知會稽

縣有惠政以註誤繫浙江按察司獄上知漢無罪命械按察使陶晟與漢俱來至即拜漢為監

察御史改左春坊左贊善尋陞右副都御史

凌景

涓川人成化舉人

凌道生

陽朔人宣德舉人教諭以上山西

凌雲

襄陽人洪武間南陽府推官振冤抑出溫繫積年滯獄一時剖決庭無留獄時論能之

凌德

長沙人成化中為宜黃縣主簿

凌則遠

長沙人成化中任臨川知縣

凌雲

巴陵人初授知州陞宗人府經歷詔進階四品

凌友德

衡陽人嘉靖戊子舉人

凌允麟

平江人萬歷中任建昌府南豐縣丞

凌通

善化人永樂舉人

凌福

沔陽人正統中建寧衛指揮同知守備汀州

凌萬里

安遠人宣德中任知縣

凌處恭

石首人正統中德安教諭

凌友志

漢陽人正德舉人任知縣

凌山

麻城人成化進士任戶部主事

凌宗貴

平江人永樂中舉人

凌珊

麻城人成化舉人

凌本

襄陽人天順中舉人歷知州

凌九皋

永興人弘治舉人以上俱湖廣

凌昇

成都人成化舉人任緬漢縣教諭

凌克溫

忠州人舉人永樂中任歸州知州

凌騏

新繁人正德舉人

凌霄

永寧人永樂舉人任寧遠縣知縣

凌鳳

字廷祥嘉定州人弘治中任岐山縣訓導以上俱四川

凌士顏

化州人嘉靖中任太和知縣

凌吉

字文學龍南人永樂中歷刑部郎中庶獄明允法之所在雖有力者不能奪僚案難之

凌霓

龍南人宣德中任知縣

凌現

吳川人宣德中任南安縣丞

凌敬

慶遠人弘治十年任荊州府照磨

凌涇

橫州人成化中
任建平縣教諭

凌華

柳州人正
德中舉人

凌辰

龍南人成化中
嘉定縣學訓導

凌奎

龍南人弘治
中任知縣

凌壁

龍南人弘治中任
羅田縣學訓導

凌宗

宣化人弘
治中舉人

凌霞

吳川人弘治中舉
人以上兩廣

按凌氏者衛康叔支子為周凌人子孫以官為氏則自三代以來其名世也遠矣嶠然翹然天

下知有凌之氏也秦漢之時裂而復合而復
渙其間四布而不可紀矣唐太宗奏天下譜牒
退新門進舊望左膏梁右寒微合一百九姓十
六百五十二家而凌氏亦與首稱焉固天下名
族也而胡上下數千百年見於載籍者寥寥不
多自吳郡督偏將軍統以上弗可攷也茲肆力
探索於凡唐宋元三朝自諸方國乘以及名賢
大纂有一姓一賢必備錄而敬書之如獲拱璧
至於當代則條分派衍各因其地而類聚之生
存者亦得併入固未暇悉攷其譜系然使在在
所產各自為一家亦便於觀覽也其在吾家先
世尤致詳焉亦蘊老泉所謂詳其所自出尊其
所自始之意也萬歷己
卯吳興凌迪知謹識

萬姓統譜卷五十六

欽定四庫全書

萬姓統譜卷五十七

明 凌迪知 撰

下平聲

十蒸

滕

南陽宮音周文王第十四子滕侯之後後失國子孫以國為氏

周滕更

見孟子

漢滕撫

字叔撫尉人有文武才順帝末揚徐盜起拜撫為九江都尉討平之陞左馮翊所得賞賜盡分

麾下性方直不交權勢宦官懷忿及論功當封太尉胡廣時錄尚書事承旨黜撫天下怨之

滕曹

北海人與劉繇通家漢末以世亂渡江依繇善屬文孫權待以賓禮家國書疏常令潤色子胤

字承嗣少有節操為丹陽太守日接賓客

滕延

字伯行北海人為濟北相時中常侍侯覽小黃門段珪在濟陰與濟北相近僕從賓客侵犯百

姓劫掠行旅延一切收捕殺數十人陳屍道路覽珪大怒訴與帝坐免後為京兆尹有能名

三國滕匡

字承嗣北海人弱冠尚公王起家為丹陽太守徙會稽所在以政治見稱每聽訟斷罪察

言觀色務盡情理

滕牧

吳孫皓還建鄴以牧鎮武昌寬恩以結民武備以防寇當時稱能

晉滕修

字顯先南陽人仕吳為將帥王師伐吳修率眾赴難至巴邱而皓已降乃縞素流涕而還

北南滕曇恭

南昌人五歲能孝母楊氏患熱思瓜非其時曇恭庶訪不得銜悲且行遇一僧問其故曰

我有一瓜相遺持歸奉母舉室驚異太守王僧虔引為功曹不就梁天監初表異之時號滕曾子

唐滕珣

東陽人太和初以太子右庶子致仕四品給券還鄉自珣始白居易送以詩曰身著錦衣兒戲

家子時為侍御史

滕蓋

東陽人代宗時以明經及第為萊州刺史有惠政終禮部侍郎

滕遂

貞元中舉明經及第歷大理評事長洲令攝吳縣時人歌曰朝判長洲暮判吳道不拾遺人不

孤人謂有漢叔輔之遺風改侍御史

滕昌佑

字勝華工畫花鳥蟬蝶竹枝生菜傳彩鮮澤宛有生意尤長于畫鷺志尚高潔脫畧時態

不求仕進

宋
滕中正

字普元北海人有材幹累官諫議大夫權御史中丞振舉綱憲人咸稱之二子立錫立晏

並舉進士

滕宗諒

字子京河南人舉進士累官刑部員外郎知涇州范仲淹薦以自代擢天章閣待制徙慶

州終知蘓州宗諒尚氣倜儻自任好施與及卒家無餘財所蒞州喜建學而湖州最盛所著有

諫疎二十餘篇

滕茂實

字秀穎臨安人靖康初以工部侍郎副路尤迪出使為金人所留即自為哀辭且募宋工

部侍郎滕茂實墓九字取奉使黃幡裹之以授其友董誥欽宗至金茂實具冠幘拜伏號泣請隨行金人不許迫令易服且欲大用茂實力拒不從憂憤成疾卒誥歸上其事贈龍圖閣直學

士官其家三人

滕甫

字元發東陽人知鄆州學生食不給民有爭公田二十年不決者元發曰學無食而以良田飽頑民乎乃請以公田遂絕其訟

滕安

字景素平江人大理評事判廣州括開田以養士掄材材木以修學舍士風一時應變

滕強恕

知索州以節用愛人為本修橋梁立儲倉無一毫過取于民

滕膺

字子勤台州戶曹叅軍宣和中盜發僊居以應方臘膺率吏士禦以方略寇不為患洎去任民

為立祠

滕康

字子濟宋城人崇寧中舉進士除秘書省正字遷著作佐郎高宗即位屢上封事下詔褒諭稱

其有諫臣風累擢端明殿學士同簽書樞密院事卒年八十四有文集二十卷

滕愷

婺源人幼穎悟好學邑簿呂廣問凡和問尹焞高第也客于此愷與為師友紹興五年登進士

調信州司戶叅軍以漕檄差考南康軍假道歸迎母就養卒于道朱熹稱其才智傑然遠出流輩之惜之

滕中

字元直甫子以蔭補官歷知安吉解州咸有美政終承議郎廉勤自將治民守邊所至有聲尤

長於詩

滕隆

婺源人以太學生恩科入仕授營道主簿時有災異缺政輒上言不忘熟八陣圖嘗以策于廟

堂不省遂絕江而歸汪伯彥遺書薦用之隆投書于江曰窮達有命何能折腰於此

滕宓

字季度吳人沉敏好學耽研經史無不洞達淳熙中以賢良徵既試命大飄疾午漏不移晷已

就考官疑其軼已擯之後再召遂不起業庭奏其學行號肅靖居士

滕處厚

字景重清湘縣人少穎拔不凡遽於春秋名動場屋再請于鄉旦評益歸重戶屢常滿議

論慷慨好言天下事後調柳州馬平步尉再辟潭州甘泉酒庫兼帥幕居官守正不阿人稱其

迂曰迂吾所自取也終不以易彼予愧予之不迂也有謂予迂者予披襟當之其立論每如

此易簣烟不亂談笑賦詩而終

滕椅

吳人以蔭補官歷淮南發運使知資州金人遷二帝北行椅與其兄侍郎茂實宗正丞禔皆陷

金中不屈
時號三滕

滕璘

字德粹婺源人與弟珙俱從熹游造詣深邃薦舉于鄉入太學淳熙八年中南宮第四人對策

文中乙科以恩陞首甲調鄞縣尉教授鄂州改除四川制置司幹官韓侂胄當國或勸璘一見可得掌政璘曰彼以偽學誣一世儒宗以邪黨錮天下善士顧可干進乎後知紹興府嵯縣適歲饑奉行荒政多所全活廟堂欲處之班列終不肯為韓屈徑從銓曹註四明發判及主管官告院以病奉祠未幾倖隆興兩為帥司叅議官至朝奉大夫遺文有溪齋類藁三十卷

滕珙

字德章婺源人告院璘之弟入太學登淳熙十四年第終合肥令與告院齊名子鉉字叔和為

安仁令早得所授學有源委注尚書行于世

滕堞

字仲復婺源人生宋末入元義不仕嘗求文丞相遺墨得所書過金陵驛詩日懸于堂焚香拜

泣過西湖拜岳將軍墓賦詩以摠憤鬱時稱其學會朱陸而得其同云

元滕安上

字仲禮年少孤立克自砥礪治性理之學被薦除中山教授召為國子丞陞太常丞拜監

察御史頃因京師地震上疏累數百言反覆深切以疾辭去尋為國子司業未幾卒贈昭文館大學士諡文穆有東菴彙行于世

明滕揖

洪武初知長沙府公直廉能當幾善斷發奸摘伏如神在任六年訟簡賦均民安盜息闔郡畏

而愛之

滕思勉

長洲人居鄉以賢士稱居官有大臣節歷陞至戶部尚書子枋刻苦讀書亦以文名

滕德懋

字思勉吳縣人才辨豪爽器量宏偉其學長於奏疏洪武中一時招徠詔諭之文多出其

手歷官兵部尚書

滕克恭

字安卿祥符人性明敏博通經史登元進士累官集賢館學士本朝洪武初兩為河南鄉

試考官壽百餘歲

滕祐

字吉甫甌寧人性剛果有才幹登進士授行人擢浙江道監察御史敬皇帝追念孝穆皇太后

遣使廣西訪其族有司承旨漫舉上因以授官賜宅未幾有訐其異姓冒濫時拘成命廷議莫決詔命祐往究祐微服問道直抵連山賀縣地方與猛獠叟媼指顧究質潛跡其廬井邱壑以

辨其真偽時內外重臣預事者皆坐譴罰先是祐嘗抗疏論傳奉官又論太常清職不當濫授黃冠尋移疾歸居家睦族置五世祭田待母黨甚厚處故舊有恩士多義之

滕用亨

總懋從子少從懋游又之四方交其英俊與晝夜講誦弟子從游者頗衆時以經義名者

不過宋儒亨學通傳疏不專一家言文詞亦辨博工篆籀永樂初以善書徵

滕霄

字子冲建安人隸籍濟陽舉天順登弘治壬戌進士選翰林庶吉士授編修轉修撰預修國史

進講經筵陞司經局洗馬霄清慎敦厚為文純正典雅一時翰學咸推重之所著有九川文集

若干卷

滕昭

字自明汝州人正統中鄉舉授御史四川都司有謀殺人獄久不決命昭往讞之遂伏辜及還

起拜僉都御史巡視福建立歸化縣以正亂巡撫南畿立靖江縣以愛民歷兵部左侍郎致仕

滕佑

字舜卿耀州人景泰辛未進士任給事中

滕康

字景晉建安人由鄉貢通判松江改惠州所至多善政藩臬交薦之陞知惠州府廉勤沉靜舉

措不苟在任十餘年政績顯著

滕員

字尚默甌寧人正統中任韶州府同知明察內敏吏不能欺凡郡之政一一興革之擢禮部郎

中後死於土木之難

滕伯輪

甌寧人嘉靖壬戌進士歷布政使

曾

魯國徵音夏少康少子成烈封為鄆太子巫去邑為曾又望出廬陵

周曾點

南武城人孔門弟子天資高明嘗對孔子言志曰暮春者春服既成冠者五六人童子六七八

浴乎沂風乎舞雩詠而歸孔子喟然嘆曰吾與點也後世追封萊蕪侯

曾參

點子師事孔子踐履篤實天性至孝悟一貫之旨得道統之傳述大學一篇為教人之法後世

追封郕國宗聖公配享孔子廟庭

曾元

參子

曾西

參孫

漢曾譚

泉陵人舉孝廉拜尚書郎有文才官終太常

唐曾芳

為程鄉令因民苦瘡以藥濟之求者接踵乃以大囊藥置井中令民汲水飲之而疾愈後人名

其井為曾升宋仁宗賜飛
白書曾氏忠孝泉五大字

五代曾崇範

廬陵人竈薪無屬而讀書自若家藏九經子
史南唐刺史賈皓就取進之以已緡償其直

崇範笑曰墳典天下公器世亂藏于家世治藏
于國其實一也何估直以償耶召授太子洗馬
遷東官使

曾文地

雩都人天文識緯黃庭內景之書靡所不究
而地理尤精梁貞明間遊至袁州府萬載縣

愛其縣北西山之邱謂其徒曰死莫我于此及
卒塋其地後其徒在豫章忽見之駭然而歸啟
其坟墓視之乃空棺
也人以為尸解云

曾文照

七歲應南唐童子科擢第三江南平為永城
令上疏論邑利害免挽船夫力歲省萬計遷

蒙城令蝗不入
境終大理司直

宋曾會

字宗元晉江人端拱二年進士第二人廷試日時蜀人陳堯叟亦有俊譽上覽其大莫適高下

並授光祿丞出為兩浙轉運使丁謂建捍海塘索民太急時無敢言者會奏列其狀中罷軍民安得

曾致堯

南豐人五代時潔身不仕宋太宗時舉進士官至吏部郎中犯顏敢言所著大集百餘卷

子易簡易占並登進士有時名時江擢第自致堯始後易占子布拜相推恩致堯封密國公

曾朝陽

永豐人慶厯間登第為石首令寬其賦稅改忠州從事教民從事文學有文集二十卷弟

匪亦同登第為南安主簿邑有寇獨力擒之辭賞不受改龍南令設學以教其子弟後移至玉

山朝陽縣元忠大觀間登第累官廣州教授所著春秋歷法論語解周易解等書門人私謚

文節先生

曾肅

泰和人居父喪廬墓數年有慈烏來巢人以為孝所感子安止登科為彭澤令掛冠歸隱安中

未冠登第上書言時政入黨籍安強為進士提舉成都路常平嘗莖暴露不莖者三十餘樞

曾有開

知衛州時水災人乏食擅貸常平錢粟與之具奏乞蠲其息

曾易占

字不疑致堯子用舉者監真州裝卸米倉遷太子中允太常丞知泰州如皋信州玉山四

縣皆有政績子三人
鞏布鞏追封魯國公

曾鞏

字子固致堯孫幼警敏數千言一覽輒記嘉祐間舉進士歷知齊襄洪福明毫滄州所至務去

民疾苦入為中書舍人文章與歐陽修齊名世稱南豐先生族凡叔卿舉進士官至著作郎

曾肇

字子開鞏弟自幼力學為文溫潤有法治平間舉進士歷事三朝更十一州所至有聲入為中

書舍人遷翰林學士與兄布同時舉翰林人為榮龜山楊時稱其立朝端嚴有大臣體卒謚

昭文

曾準

字子中贛州人嘉祐間進士知公安縣火燔民居準以身叩之風反滅火復通判臨江明慎刑

獄芝草生園扉或勸以獻準抑之長子懋少穎悟官至吏部尚書

曾公亮

字明仲晉江人舉進士知會稽縣累官吏部侍郎同中書門下平章事公亮方厚莊重沉

深周密明練文法習知典故韓琦為首相每諮訪焉累封魯國公以太保致仕卒謚宣靖

曾孝寬

字令綽公亮子以蔭知桐城縣累官會書樞密院事後以端明殿學士知鄆州

曾孝廣

字仲錫公亮從子元豐末為北外都水丞元祐中議復河故道孝廣以為不可歷水部員

外郎河決內黃詔孝廣行視遂疏蕪朴鑿鉅野導河北流紓澶滑深瀛之害後為戶部尚書出

知杭州潭州加顯謨直學士

曾孝序

字逢源晉江人從家泰州累官至環慶路經略安撫使論事忤蔡京竄嶺表後知潭州破

平猺人進龍圖閣學士知青州繕城訓兵金人不敢犯將官王定捕臨朐盜失利以言憾敗卒

新闢入廳事孝序與子討皆遇害後贈光祿大夫謚威愍訐承議郎

曾孝純

字君旄公亮季子公亮卒詔遺蔭外增推恩二人孝純為殿中丞賜同進士出身辭以所

得官子其族之人未仕者二十四年不改秩紹
聖中擢太常丞執政沮之遂杜門不仕治家有
法子弟非冠帶不見晝日一不得居私房男女
燕集異席閨門肅然不蓄私財不置別產故其
子孫獨貧

曾孝蘊

字處善晉江人為江浙荆淮發運使後知杭
州宣和二年復天章閣待制知歙州方臘起

青溪孝蘊約救郡內無得奔擾分兵守扼塞有
避賊來歸者獲罪使出境人稍恃以安會移青
州既行而歙臨道改杭州賊時已破杭孝蘊單
車至城既克復軍士多殺人孝蘊下令從者得
自首無輒殺皆
束手不敢驚

曾誕

公亮從孫孟后廢誕三與鄒浩書勸力請復后
浩不報及浩以言南遷誕著玉山主人對客問

以譏之其書既出或以此
韓愈諫臣論誕仕亦不顯

曾慥

字叔夏準長子少穎悟落筆驚流輩登元符三年進士知興化拒楚命表高宗勸進扈從隆祐

孟太后至虔軍民偶忿爭賴以撫定累官吏部尚書著內外制十卷東宮日記十卷

曾如驥

字德清泰和人判邵州元兵入城僚吏諫曰曷不壺漿以迎曾紹諾退書舍生取義于壁

登于城投濱江死事聞贈敷文閣待制謚忠愍立廟記

曾奉先

字紹宗篤志力學登進士判羅源簿有清名歐陽文忠公推重之陞賀州法曹

曾開

字天海準次子崇寧進士歷官至禮部侍郎秦檜主和議開抗疏力爭忤檜出知徽州尋覲職

後復秘閣修撰卒開嘗師游酢友劉安世故立朝遇事臨大節而不可奪

曾升

字孟高初以入粟為吏靖康中敵騎犯邊被檄守楚州與金人合戰奮不顧身遂死于陣州賴

以全事聞贈五官與子恩澤立廟于楚州祀之

曾民瞻

南昌尉通天文學以晷漏有差遂更用其法箭傍二木偶左者晷司刻夜司點則擊板以

告右者晷司晨夜司更則鳴鉦以告自謂得古人之所未至

曾覲

字純甫號海野東都故老有詞可稱

曾子良

臨川人咸淳末知淳安縣清慎自守時邊事已急多方保障民賴以安後以譖籍其家惟

故書敗絮而已君子惜之

曾悟

字蒙伯翰林學士肇之孫也宣和二年進士靖康間為亳州士曹金人破亳州悟被執抗辭慢

罵衆力劇之屍體無
存者妻孥同日被害

曾紆

葦姪布之子以詞翰名世有志節建炎間嘗力
勸湖州郡將梁瑞會起兵勤王後官至直寶文

閣知
衢州

曾忞

字仲常葦孫補太學內舍累官通判温州項次
于越建炎中金人陷越被執忞見金酋辭氣不
屈責以大義金人殺之肇孫悟舉進士為亳州
士曹金人破亳州悟被執抗辭慢罵衆力劇之

曾漸

南城人紹熙中進士官至工部侍郎立朝有風節卒贈少師謚文莊

曾項

紹興中宰相熟王伯剛稱其知足以知勇足以
行御吏若西門之治鄴愛民如子產之治鄭云

曾幾

字吉父開禧幼有識度事親孝紹興間歷官浙
江提刑秦檜怒問幾亦罷及檜死起知台州尋

授秘書少監修實訓書成權禮部侍郎卒
謚文清幾為文純正詩尤工有集五十卷

曾滂

字孟博臨川人為人質直剛烈四方宗陸氏者
自孟博與李德章師復齋始孟博長象山五六

歲象山甚

愛重之

曾極

字景建滂子志氣豪放聲名四起朱晦翁得其
書及詩大異之書往來深期之謂其文似老蘇

父子鴈湖李公南塘趙公相與賡酬最多嘗以
詩語涉謗訕得罪謫道州卒于其所李公心傳

為言曾極父斥可念孝宗曰非為江湖集耶
後有旨歸莫所為文有春陵小雅金陵百詠

曾光庭

吉水人仕為永州東安簿靖康之難勒兵勤
王會徽欽北狩列表勸進高宗立光庭不願

受賞

曾乾度

字順承文熙子淳化三年進士兩任推官三
為縣五興州年甫六十懇請分司南京再求

監舒州靈仙觀時張仕遜為相言其風力方邁
使臥理一郡亦足以厚風俗廼起知筠州不赴

遂以太常少卿致仕率諸生興學
教以孝弟幅巾綈屨緇紳榮之

曾三異

字無凝少有詩名楊文節公深嘉之尤尊經學屢從朱文公先生問辨因扁讀書之堂曰

仰高鶴山魏文靖公為之記嘗從文忠公於里第攷訂典章纂修文史皆以屬之少三舉鄉貢當補官弗就不治生產作業著書滿家士友來請益官穀不厭部使薦於朝授承務郎瑞平初以秘閣校勘召力辭時年八十一

曾璽

字聖甫閩縣人學問淹貫文章簡古慶元尉
上高有聲新尉廳記尉題名後陞廣東漕使

曾守約

大庾人以鄉舉充郡學正行義著稱郡守李

為著魯齋銘有忠為德基孝為行本之辭

曾和應

字賢叔上猶東廓人隱居梅嶺之陰清苦好吟八十不倦黃秋巖喜其得情性之正選而

集之名梅溪四體廬陵趙青山諸老多有品題粹行于世

曾懷

字欽道晉江人公亮曾孫也以父蔭紹興中歷知真州訓習民兵有紀張浚督師大奇之後遷

戶部侍郎言量入為出使天下之財足天下之用進權尚書除叅知政事代梁克家為右丞相懷嘗言事之大者視之以小小者視之無天下無復事矣卒封魯國公

曾丰

字幼度樂安人也宋乾道五年進士以文章鳴晚年恬於仕進築室曰樽齋四方求詩文者坐

常滿有緣督集行於世仕至太守何柳塘穀贊云不爽不惠斯道之魄不歐不蘓斯文之脈外容萬象中無一物世以為名言

曾伋

字彥思紹興三十年以大理寺丞出知州事一
意為民隆興初元有旨江西和羅百萬轉輸丹
陽一時有司失於討論袁亦在數伋具不可羅
狀條舉先後以間乞先罷黜朝廷嘉而免之是
邦得免和
羅自伋始

曾三復

新淦人與弟三聘俱乾道間進士三復性耿
介耻奔競紹熙初歷知池常州召拜監察御
史持論正平不隨不激累官至
起居郎兼權刑部侍郎致仕

曾三聘

字無逾三復弟幼有異質日記十言由進士
累官秘書郎光宗時三上疏指陳時事黨論

興坐重効卒贈直龍圖閣謚忠節第三異少有詩名嘗著新舊官制通考通釋除大社令力求去時號雲巢先生三英嘗考究三國六朝攻守事迹著南北邊籌十八篇又著蒙史

曾興宗

字光祖寧都人篤志為己之學自號唯菴冠婚喪祭一用古禮朱熹嘗稱之偽學之禁興

學者諱名其師興宗執禮益勤勵志益苦孫原一原卿俱博學工詩

曾紘

南豐人家襄陽博學善屬文號臨漢居士子思號懷峴居士亦能文俱有集行世

曾植

字子直晉江人太學上舍生用孝宗登極恩釋褐累遷勅命所刑定官司農寺丞輪對言用人

之道不當以南北文武二其心又不當以腐儒之故廢棄真儒求補外知南劍州

曾用虎

字君邁從龍之弟弱冠工於文累舉不第以兄任歷官興化軍創城堤及起太平廢陂民

蒙其利號曾公陂三年大治陳韓帥
江右請自代除府事改江西提刑

曾治鳳

字君儀從龍李弟開禧元年進士歷官廣西
提刑以將作監知袁州復直煥章閣帥廣東

性簡儉愛惜公帑一毫不以妄費不嗜殺戮
發循惠間郡請兵捕追不從必諭降之端平二

年進直
徽猷閣

曾恬

字天隱公亮曾孫少從楊龜山謝上蔡陳了翁
劉元城諸賢游為存心養性之學紹興中仕至

太宗正丞秦檜當
國恬自守不為詘

曾集

紹熙間知南康軍勤理庶務首募先賢劉渙之
為人修其墓亭礪石以培其封割公田以奉其

祀朱熹稱其有
尊賢尚德之心

曾松

字聖伯章貢人幾之從孫仕至江西帥參松敬賢樂善居官以才廉稱嘉定中寓居建陽縣縣

東北有竹原山劉勉之舊隱朱熹問道之所也松慨想陳迹作樂斯菴於其傍友人黃幹記之

曾從龍

字居錫公亮四世從孫初名一龍慶元間進士第一賜今名累官樞密使兼叅知政事有

才行文學數歷中外尉有聲譽且無所附麗卒贈少師弟用虎天麟治鳳皆歷顯仕以吏能著稱

曾淵

字廣微南豐人景定間知新昌有詩聲且優於政嘗修大成殿終于安南

曾原一

字子實興宗孫紹定四年領鄉薦嘗與從弟東湖書院山長原祁師吉安廬陵楊伯子俱

博學工詩紹定庚寅避亂鍾陵從戴石屏諸賢結江湖吟社寇至原一偕其叔益之傾貲產募

丁壯築城垣為保障寇知有備不敢犯
民多德之著有選詩衍義蒼山詩集

曾塤

瑞州錄事叅軍以郡命賑濟饑民值元兵至被擒誘之以利不從且詈之遂死贈秩官其一子

曾造

南豐人文肅公玄孫知翁源縣以化民成俗為急務藉官田之入以養士於是文化境美中州

邑人士相與祠于學

元曾德

漁陽人宗聖公五十七代孫母早亡父仲祥再娶左氏舅游襄陽居焉時兵陷襄陽失左氏德

徧求南土得于廣海奉迎歸養終身

明曾萬中

吉水人自幼穎異元季為千夫長江右大亂萬中與弟粹中保障鄉里歸本朝還于吉安

兵至走京師乞援萬中江省叅知政事弟粹中親軍指揮使後城陷兄弟皆戰死

曾燿

字日章吳江人少學春秋於魯道源洪武間選於鄉令黃陂召侍讀禁中修典令使交南還陳

黎氏所以嘗討贊師有功卒於富良江

曾鳳韶

廬陵人草除間為監察御史侍殿上太宗皇帝為燕王時入朝由御道入不拜鳳韶言殿

上宜展君臣之禮宮中乃叙叔姪之情後北平兵將渡淮遣使詔請罷兵歸國無敢奉使者鳳韶獨請行至軍前不納鳳韶取竹通節入詔鼓風達之不報既登極鳳韶歸第嘉其直以御史召不赴尋加侍郎召又不赴乃刺血書辭詞囑妻李氏子公望勿易衣遂自殺

曾濬

薊州衛鎮撫與馬宣守州城北平兵攻之不能下招之降不肯輒出兵力戰兵敗為張玉所執

不屈死之

曾榮

字子啟永豐人永樂進士第一授翰林修撰時簡拔進士二十八人進學秘閣月試優劣榮信

筆百十言以是名聞天下為人溫雅英邁官至少詹事兼翰林侍講學士預修兩朝實錄卒贈

禮部左侍

郎謚恭襄

曾鶴齡

字延年泰和人永樂進士第一授翰林修撰預修實錄陞侍講學士有松坡集臞叟集藏

家于

曾泉

泰和人永樂進士宣德中以御史謫任汜水典史蒞政勤能頻課生徒校官厭之泉乃選四鄉

俊秀自教之三年多有成材邑臨黃河教民結網捕魚大得其利時督民開荒田伐材木耕無牛者助之顛連者得棺以送死貧乏者得財以成婚民感其惠為立生祠

曾伯良

永樂中知海陽縣視篆後立碑于城隍廟曰
有外施仁義內藏禍心者神必殛之又書清

白傳家四字于寢室民愛之如父母
及滿去父老持禮幣賙之一毫不取

曾魯

字得之新淦人國初應聘授儀曹主事仕至禮
部侍郎致仕卒學者稱為守約先生公蓄德熙
和溫如春風不見忿戾色退然若不勝衣其從
仕也精白一心知無不為凡大典禮大制度必
經公損益而後定
真濟世之學也

曾鼎

字復鉉永豐人永樂
壬辰進士歷參政

曾慎

寧都人永樂甲
申進士任編修

曾令得

名凱以字行吉水人永
樂乙未進士任御史

曾暉

字時升泰和人宣德癸丑進士歷禮部右侍郎

曾鑑

字克明桂陽人天順甲申進士初授刑部主事通州民十餘輩坐盜獄且具鑑辯其誣尋以父

喪闋服改工部督造供應器物綜理甚密調吏部驗封遷稽勲員外郎

曾輗

字文載永興人成化乙未進士歷刑部員外郎值平陽有訟田父淹及蘓州衛有訟殺人罪者

繫獄十餘年輗往訊立決出補紹興知府均輸薄賦釐弊補役亡何乞休歸年七十四卒子介

全念皆登進士

曾全

字復初成化丁未進士授戶部主事值星變上疏陳四事且言都御史屠鏞不法被中以事逮

繫詔獄褫秩歸號碧潭居士築室授徒以詩文自娛弟介登進士亦豪宕不羈

曾蒙簡

名廉以字行泰和人正統乙丑進士歷按察使

曾彥

字士美泰和人成化戊戌進士第一歷翰林院侍讀

曾追

字文甫泰和人成化戊戌進士第三任編修

曾煥

字貫辰吉水人成化甲辰進士歷參政

曾昂

字光表吉水人成化丁未進士歷副使

曾子唯

保昌人由教諭天順初陞真定府學教授學問優長誨人有法秩滿考最擢唐府長史

曾璉

江陵人由吏員正德中任四川綿州判官流賊廖麻子等攻劫州縣朝廷遣都御史彭澤總制

兵馬命璉率兵禦於境內勢莫能支竟死于敵事聞贈承事郎上林苑監丞蔭其子綬入監讀

書

曾銳

字子重揚州人弘治進士仕至右副都御史為
宰執所陷死隆慶元年贈兵部尚書謚襄愍

曾翀

字朝舉蚤負氣節雅有志當世文章詞賦獨得
古體登嘉靖己丑進士授南京刑部主事訊讞

明允獄無冤繫尋改河南道監察御史彈劾不避時以勁直稱之

曾守約

字子如歸善人嘉靖己丑進士歷大理寺丞

曾鈞

字廷和進賢人嘉靖壬辰進士歷刑部侍郎謚恭肅

曾承芳

字英遇惠安人嘉靖丁未進士任御史

曾佩

字德夫臨川人嘉靖辛丑進士仕
御史復命忤旨謫戍隆慶初復職

曾于拱

字無極泰和人嘉靖辛丑進士歷都御史

應

汝南官音周武王第四子封為應侯以邑為氏又望出潁川應平聲

漢

應順

南頓人舉孝廉累官冀州刺史廉直無私事後母至孝異樹忽生聽事人以為孝感所致十子

皆有才名

應高

中大丞相趙王

應奉

字世叔順玄孫讀書五行俱下仕為武陵太守遷司隸校尉桓帝欲立田貴人為后奉諫止之

黨事起稱疾而退

應劭

奉子舉孝廉累官泰山寺曹掾專政棄官歸作春秋斷獄二百五十篇獻宗召為軍謀校尉著

漢官
禮儀

應曜

隱于淮南中山漢時與四皓俱徵曜不
至時語云商山四皓不如曜陽一老

應貞

字吉甫自漢至魏世以文
章顯軒冕相襲為盛族

三國
應瑒

字德璉順六世孫以文學名識治體仕魏為五
官將文學多識朝廷制度弟瑒好學善屬文仕

魏累官侍中時曹爽專政瑒作詩諷
之瑒子貞有文學官至散騎常侍

應詹

瑒弟詹之曾孫以才藝文章知名當世仕為太
子舍人以功封觀陽縣侯領江州刺史子玄嗣

官至散騎常侍次子誕有器
幹歷六郡太守龍驤將軍

應璩

衛尉

應碩

汝南太守

晉應綽

西晉揚州刺史吳人佃皖城為遼惠安東將軍王渾遣綽督淮南諸軍攻破并破諸屯焚其積聚

唐

應智頊

建城人性剛毅遭難不懼隋末蕭銑林士弘攻掠江南智頊召義兵保靖一方唐興李大

亮宣慰江南智頊歸之因表置靖州命為刺史功德及民民愛之如父母

應夷節

汝南人生不喜茹葷性敬慧長遊天台龍虎山師馮惟良得上清大法栖真天台之道元

院日誦黃庭大洞二經為人致福數致感應忽一日沐浴入靜疑神翌日解化是夕清香馥郁

猿鳥悲鳴及就定但空棺而已

欽定四庫全書

萬姓統譜
卷五十七

三

宋 應孟明

字仲實永康人隆興初進士後累官吏部侍郎韓侂胄嘗誘以顯官俾誣趙汝愚孟明不

從士論以此重之

應俊

天台人號東野景定知新昌弭盜安民政教兼舉嘗奏罷縣稅務有琴堂論俗編行于世

應鏞

字子和蘭谿人登博學宏詞科仕至知開州所著有書約義禮記纂義傳于世

應傑

字之道昌國人嘉定中進士仕為翰林學士知制誥長於對偶每制誥出人爭觀之一夕帝召

傑草麻夜四鼓五制皆就帝奇其才官至叅知政事封臨海郡公

應安道

無為人重和二年四月以中奉大夫充徽猷閣待制知平江軍府

應舜臣

婺州人後徙居貴溪登慶歷間進士官至太常少卿三司判官極言新法不便忤王安石

出知
洪州

應節嚴

字和父平陽人少名夢辰中童科淳祐甲辰登武第庚戌換文舉歷太學錄國子簿司農

軍器丞兩淮機叅右司檢詳淮西提刑兩浙運判刑部侍郎權吏部侍郎寶謨閣待制特中奉大夫在六館時上疏論渠璫蹟政淮幕時登陴守禦才裕經濟識法制獄情重軍餉咸著其能尤善古文有文集若干卷

應係

字自得昌國人六歲能詩登紹熙四年進士調烏程尉議毀淫祠獨存徐孺子廟隣邑有沈氏

兄弟訟財郡檄係按實係委曲開諭適沈有子魁鄉薦因賦詩傲之有云嘉木灌叢春意好可憐不種紫荊花兄弟感悟其爭遂息官至文林郎

應子和

詩有云兩岸夕陽紅臘炬短燒紅風過落花紅因話錄云張子野為三影尚書子可為三

紅秀才

應與權

淳安人性孝友嘉定間游太學以親老乞歸養上美其意投本邑令公勤廉恕興學勸人

甚稱之

應純之

知楚州崇儒術興學校修城池民賴其德

應本仁

字本立鄞人以家世為宋臣義不仕元隱居城南博學好禮愛喜施慷慨有大志嘗慕范

文正之為人規建義莊創屋舍五十餘間割慈溪腴田五百餘畝收其歲入以濟親族里黨之

貧乏與婚姻喪葬之不能舉者又即其中為義塾延名師以訓導親族里黨之子弟供膳服用

悉有常制時其出納定其條約使後裔世守之
郡府以其事達宣慰使司行中書省移浙東廉
訪使者覈實以聞褒嘉之時翰林學士黃文
獻公潛為紀其事于石故世傳為應家館云

明

應履祥

奉化人洪武末知德化縣廉謹
公恕勸學獎士累官按察使

應志和

名律以字行少從族父尚履游比長登拙訥
葉公之門拙訥亟相推許永嘉黃文間公一

見遂定為忘年之交由是聲譽日起遠近交辟
南畿提學孫公鼎薦為鹽城訓導以母老辭周
郡守旭鑑復以郡學薦乃始迎母同赴官居無
何丁母憂服闋改蘭陽縣蘭陽素乏科第又其
僚酗酒而愎先生結以恩禮久之愧屈士服其
教科第亦班班出任滿陞鄱陽教諭蘭陽之人
相與立生祠祀焉其在鄱陽尤篤意風教未及
引年遽乞休歸更號宜休居士考德問業門無

虛席年八十有四卒
所著有復菴存稿

應承完

奉化人登張信榜進士授吉安泰和令俗悍好訟素號難治承完摧強振弱羣姦斂跡民

賴以安

應伯和

洪武間知荆門州州律已廉介治民仁惠去任惟琴書而已州人懷其恩德久而不忘

應顥

字文明淳安人登正統十年進士第授監察御史巡視福建銀場賊林開三等鳩集處盜千餘

人標掠顥斬其賊首悉平賜緡段寶鈔顥清理福建軍伍巡按蘓松等處賑饑全活甚眾陞南

大理丞遷雲南大理同知改知揚州府陞湖廣副使顥修築江岸千餘丈功就而民不知勞陞

福建按察使轉左布政以老疾自陳致仕

應佐

江都人自少以志節聞弘治間貢為太學生鄉有妖佐為辨怪文以禱于神妖遂熄

應振黼

字繡夫象山人性資敏慧端嚴不苟由歲貢任泗州判官綽著能聲造濟淮橋築永寧壩

民德之家居以所得俸散于家人設家塾以教子弟代供束修人稱厚德君子所著有尋樂素

紀年錄
藏于家

應元

徵字敬之由舉人教諭武寧轉國子學錄以文學宣聲於時邱丈莊公敬禮之武宗幸太學

進講大學平天下章拜錦衣白金之賜遷延平通判築沙尤二城陞興化同知所著有澹菴彙

若干卷
藏于家

應雲鷺

字瑞伯象山人振廟子資稟卓越學識該博嘉靖辛卯領鄉薦登辛丑進士第知臨川搜

別吏弊清理錢糧為時成式疏千金文昌二陝
以興水利翻刻王荊公文集陞車駕司主事尋
轉職方司員外武庫司郎中本兵凡有
謀議悉賴贊畫方欲柄用未幾卒于官

應價

字子林遂昌人嘉靖己丑進士督楚學政端方
直趣果決嚴翼篤志造士清行檢杜請託會僚
無笑容楚愍王召宴不赴餽賂不納王恐其妨
己也深嫉之無何王被弑外人不覺獨書伴官
朱恩率楊鍾等踰垣赴武昌守何城泣報死狀
且曰恩等受主恩當以死報城具以此情白當
路而長史孫立安受英燿黃金帶鉤既報中風
矣價曰某職司風化以子弑父法當正刑況國
君乎遂諷都御史車純亟圖申鳴純囑需諸司
亦沉吟價曰如天地神明在上何拂衣起純從
之走吏速御史伊敏生會奏降旨勘
鞫恩言不誣始械繫燿入京伏法

應大猷

字邦升仙居人正德辛巳進士歷官刑部尚書時年九十六隆慶萬厯兩詔存問子八人

存初南評事存性丙辰進士任知府存卓已未進士任副使孫曾孫至六十餘人

應明德

字在明仙居人嘉靖癸丑進士歷副使

乘

平陽楚大夫子乘之後以王父字為氏又云去聲食證切

周乘睢

賢人

漢

乘昌

煮棗侯

乘弘

治易為博士

乘公濟

烏程人

乘興

湖三老上書訟王尊治京兆功效

乘蘓

章帝時封鉅鹿公知慶元

承

千乘徵音衛大夫承成之後

周承盆

趙簡子攻陶有二人先登死于城上簡子欲得之陶君不與承盆疽謂陶君曰簡子將掘君之

墓以與君之百姓市曰踰邑梯城者將舍之不者將掘其墓朽者揚其灰未朽者辜其尸陶君懼請效二人之尸以為和

漢承宮

字少子姑幕人八歲為人牧猪過學舍棄猪聽講後為大儒永平中為博士遷中郎名播匈奴

北單于來求見宮貌醜以魏應代之

承疊

宮子濟
陰太守

宋承敷

紹興中知廣昌縣為政寬和儒而好禮首
建學校以興賢才推誠勞來民樂從之

承之

巴州清化人幼雄特好兵略乾德中文協率眾
攻間巴承之竭資募士擒協太祖召見賜感義

節度兼
知巴州

承賓

紹興七年
泰州教授

金承暉

字維明本名福興好學淹貫
經史章宗即位遷近侍局使

明

承谷

武進人洪武初為交城縣丞勸農桑平
徭薄賦人皆便之越四年陞兗州同知

承廣

延陵人洪武初為
南昌知事有詩名

承繕

字伯純武進人永樂中
由人材仕黃陂知縣

承宣

泰和人弘治十年
任潛江縣訓導

承天秀

字鍾之武進人正
德舉人錢塘知縣

承林

江陰人嘉
靖進士

承啟信

真定人嘉靖中任山
西平陽府學訓導

徵

理徵
之後

三徵崇

河南人
率更令

騰

本性滕避難改焉
今開封有此姓

漢
騰霖

五代
騰曇恭
梁孝
行傳

登
見姓苑
望
出南陽

漢
登道望
左馮
翊

登豹
將作
大匠

三國
登定
關中
流人

稱
見姓
苑

漢
稱忠
功臣
新
山侯

曾見姓苑夏

后有曾氏

漢
曾賀

功臣表

曾厓

朋

宋

朋水

永嘉人淳祐間
知安遠縣事

朋山

仙遊人淳祐間
知德化縣事

恒

楚大夫恒思公之後
見風俗通望出東海

漢

恒裴

東安長

恒參

恒榮

印藪

憑

唐憑祥興

雱都人曉智略與二弟皆英武尚義黃巢之亂傾貲募兵為勤王計累功為將軍

宋憑正

太平興國二年知泰州軍

升

見姓苑

南升元

高安人瑞州路參軍

呈

漢
呈紳印藪

陵

見姓
苑

明

陵茂

高郵州人永樂
中任溧州同知

陵志高

永寧人弘治
中平鄉教諭

陵雲

宣化人嘉靖貢士
任通道縣知縣

藤

明

藤文澤

吳川人宣德中
同安縣縣丞

僧

見姓
苑

唐僧可朋 詩人

南僧道榮 護軍高歡還至洛陽遣贊決之

宋僧寶磨

崩

明崩愈堅 潛山人正德中任固始縣縣丞

崩可立 秦和人萬歷間伏羌典史

興 見姓苑

漢興渠 濟陰王謁者後以功封高望亭侯

宋興侯

興依

供嘉慶進士儀隴人

明

興安

北直人正統間太監

直隸唐縣有興氏

繩

明

繩服

嘉定州人天順中任永福縣知縣

弘

太原角音風俗通衛大夫弘演之後

周弘演

衛懿公有臣曰弘演遠使未還狄人攻衛追懿公於榮降殺之盡食其肉獨舍其肝弘演至報

使于肝畢呼天而號盡哀而止曰臣請為表因自刺其腹內懿公之肝而死

漢

弘恭

元帝時
宦者

三國

弘咨

弘璆

吳人

宋

弘宏

宣和元年知
泰州軍尹

明

弘啟

臨川人正德中
武平縣知縣

弘洪

遂寧人弘治中
建平縣主簿

永

明

永如鑑

繁昌人萬歷間四
寧州衛千戶

昇

宋昇元中

撰海外使臣程記三卷

棚

音朋或作移音多恐非

漢

棚宗

南山賊見王尊傳

鄮

如姓夏少康封少子曲烈于鄮其後為氏

仍


見姓苑有仍氏生少康以國為氏

凌

音凌見直音

崩

崩伯繫之後



萬姓統譜卷五十七

欽定四庫全書

子部

萬姓統譜卷五十八

詳校官中書臣徐志晉

主事臣祁韻士覆勘

總校官知縣臣楊懋珩

校對官中書臣王家賓

膳錄監生臣范鍾

欽定四庫全書

萬姓統譜卷五十八

明 凌迪知 撰

下平聲

十一尤

劉

彭城宮音陶唐氏之後受封于劉裔孫劉累事夏孔甲為御龍氏商為豕韋氏周為唐杜氏伯子熙叔奔

晉為士氏孫士會適秦復歸晉有子晉後劉氏周定王母弟劉康公為周大天謚曰康食采于劉亦為劉

氏士會之後公煇使豐熈生劉邦字季婁敬德漢賜姓劉頃伯歸漢賜姓劉劉知遠沙陀人冒劉氏魏孝

文帝草胡俗改獨孤為劉

周劉累

學擾龍於豢龍氏事帝孔甲能飲食龍帝賜氏曰御龍以更豕韋之後

秦劉海蟾

白鶴觀知事崔重微忽見道人謁於堂下揖之坐不語但微哂重微起取金相贈未入房

已聞弄筆聲急回視已失道人壁間有題字以仙書證乃秦人劉海蟾之筆

劉端

字執嘉生漢高祖

漢劉興居

高祖孫齊悼惠王肥子誅諸呂有功封東牟侯惠澤及於邦人至今廟祀不絕

劉章

朱虛侯平諸呂

劉屈氂

為相與戾太子戰死者數萬人

劉子雍

有王佐才嘗與諸文學論鹽鐵深中利弊桓譚稱曰言王道矯諸正彬彬然可謂弘博君

子矣

劉向

字子政本名更生楚元王四世孫年十二以父

選名儒俊材向與馬獻賦頌凡數十篇元帝即位蕭望之周堪薦更生明經有行擢為散騎宗

正以譖免官成帝時復起為光祿大夫以趙后淫亂著列女傳以王氏權大盛作洪範五行傳

及說苑五十篇數言得失陳法戒辭多痛切發於至識上數欲用為九卿以王氏居位者所持

故終不遷居列大夫三十餘年七十一卒向嘗校書天祿閣有青藜夜照之異貞觀十三年配

享尼父廟堂宋祥符二年詔封彭城伯

劉歆

字子駿與父向領校秘書講六藝傳記諸子詩賦數術方技王莽篡位歆為國師

劉祐

字伯祖安國人為河東太守時令長多中官子弟祐黜其權強平理寃結三轉大司農時中常

侍蕪康管霸占民田業民多困窮州郡喪氣祐依科品沒入之其不避權貴如此

劉殷

宣帝之玄孫楚孝王囂之曾孫家於彭城自囂至殷積累仁義世有名節建武中光武下詔封

殷為菑邱侯奉孝王祀使就國後以國屬楚徙封杼秋侯十九年行幸沛詔問郡中諸侯行能

太守薦言殷束修至行為諸侯師帝聞而嘉之二十年與車駕會沛從還洛陽留為侍祀侯永

平元年以國屬沛徙封居巢侯揚州刺史觀恂薦殷在國口無擇言行無怨惡宜蒙旌顯顯宗

嘉之徵殷行執金吾事肅宗即位以為長樂少府建初二年遷宗正在位數言政事其收恤九

族行義尤著時人稱之年六十卒子憲嗣憲卒子重嗣

劉愷

般之子憲之兄以當襲般爵讓與弟憲遁逃避封久之至永元十年章帝徵拜為郎稍遷侍中

愷之入朝在位者莫不仰其風行遷步兵校尉十三年遷宗正免復拜侍中遷長水校尉永初元年代周章為太常愷性篤古貴處士每有徵舉必先巖穴論議弘正辭氣高雅六年代張敏為司空元初三年代夏勤為司徒永寧元年稱病上書致仕安帝親政朝廷多稱愷之德帝乃遣問起居厚加賞賜尚忠陳忠上疏薦愷遂拜太尉視書三年以疾乞骸骨久之乃許卒于家詔使者護喪事賜東園秘器鈔五十萬帛千足

劉晨

永平中邺人入山採藥失故道行數里至溪許二女迎歸食以胡麻飯後求去指示元路至家

子孫已七世矣天台縣西北三十里有劉阮廟

劉根

京兆長安人漢成帝時入嵩山學道神人授以秘訣遂得仙用術濟人潁川太守史祁以為妖

遣吏召根欲戮之至府祁曰能召鬼即至不爾當戮根曰甚易借筆書符忽見兵甲縛二囚廳前祁熟視乃父母也即驚愕流涕鬼責其子曰汝何得罪神仙乃累親如此太守伏罪求赦方解根遂不見

劉陵

安成長先是邑多虎患民徙他郡陵修政月餘虎皆出境流民復還

劉輔

河間人漢宗室舉孝廉擢諫大夫成帝欲立趙婕妤為后詔封婕妤父臨為列侯輔上書言腐

木不可以為柱卑人不可以為主書奏繫秘獄卒慶忌等悉上書乃減死論為鬼薪終于家

劉珍

南陽人少好學永初中為謁者僕射詔校定東觀五經諸子傳記百家藝術及作建武以來名

臣傳遷侍中拜宗正轉衛尉卒所著誄頌連珠凡七篇又撰釋名三十篇以辨萬物之稱號云

劉昆

東昏人深于易教授子弟五百餘人王莽篡位昆匿河南負犢山中光武時歷江陵令弘農太

守徵為光祿勳召問曰前在江陵反風滅火後守弘農虎北渡河行何德政而致是邪昆曰偶

然耳帝數曰長者之言也

劉平

字公子彭城人嘗為菑邱長政化大行更始時與母俱避亂澤中平出求食逢賊將烹之平乞

歸食母卑就烹既而如期往賊義之得全後為全椒長累官至宗正

劉陶

字子奇潁川人通尚書春秋舉孝廉累官侍御史封中陵鄉侯三遷尚書令拜侍中數切諫為

權臣所憚徙京兆尹不就徵拜諫議大夫上書言時務八事

劉繇

南陽人光武之長兄性剛毅慷慨有大節自王莽篡漢常憤憤懷復社稷之慮莽未盜起繇自

發春陵子弟誘新市平林兵合軍而進大敗莽兵更始立拜繇大司徒封漢信侯後為更始所

害光武即位追封齊武王

劉隆

南陽人安眾侯宗室也從世祖為騎都尉累拜誅虜將軍討平李憲屯田武當封竟陵侯後與

馬援擊交趾破之封慎侯卒謚靖侯

劉恭

為更始侍中更始降赤眉為所殺恭夜往收殮其屍

劉茂

字子衡光武時為太原令門下掾時赤眉二十餘萬眾攻郡縣殺長吏及府掾史茂負太守孫

福踰牆藏空穴中得免其募俱奔孟縣晝則逃隱夜求糧食積百餘日賊去乃得歸府明年詔

書求天下義士福言之于
朝詔書即徵茂拜議郎

劉矩

字叔才沛國蕭人少有高節舉孝廉為雍邱令累官尚書令性亮直不附貴勢延禧中為太尉與黃瓚種暭同心輔政時號賢相

劉寵

字祖榮年平人宗室子父丕博學號為通儒寵以明經舉孝廉遷會稽太守郡中大化徵為將作大匠山陰五六老叟人齋百錢送寵且曰自明府下車狗不夜吠民不見使故自扶奉送寵為人選一大錢受之累遷司徒太尉

劉岱

字公山寵弟方之子方官至山陽太守董卓入洛陽岱從侍中出為兗州刺史虛已愛物為士人所附黃巾賊入兗州岱擊之戰死

劉淑明

樂城人明五經教授諸生數百人舉賢良方正辭不就桓帝聞其名切責州郡使與病詣

京師淑明起赴洛陽對策第一拜議郎又陳時政得失災異之占事皆驗遷尚書納忠建議多

所裨

並

劉儒

字叔林陽平人舉孝廉遷侍中桓帝詔求直言儒上封事十條辭甚忠切不見納出為任城相

尋徵為議郎為實武事下獄自殺郭泰嘗稱其口訥心辨有珪璋之質

劉瓚

高唐人為太原太守嘗以直言坐罪陳蕃上疏訟瓚志于去惡欲釋其罪不許瓚竟死獄中天

下寬之

劉寬

字文饒華陰人司徒崎之子性度寬仁桓帝時守南陽吏人有過蒲鞭示辱嘉平中拜太尉後

封達
鄉侯

劉翊

潁陰人累官陳留太守及歸惟乘車馬不載他物道遇士大夫病死輒以馬易棺槨之達貴人因餒又殺所駕牛食之或止之翊曰視死不救非義士也

劉梁

字曼山宗室子孫自少孤貧賣書于市以自資常疾世多利交以邪曲相黨乃著破羣論時之覽者以為仲尼作春秋亂臣知懼今此論之作俗士豈不愧心其文不存桓帝時舉孝廉除非新城長後拜尚書郎

劉瑜

廣陵人好經學尤善圖識天文歷算之術州郡禮請不就延禧中始舉賢良方正

劉虞

字伯安東海郯人初遷幽州刺史民夷感其德化後為大司馬退封侯務存寬政都督農植民

悅年登青徐士庶避
難歸虞者累百萬口

劉繇

字正禮與兄岱齊名興平中為揚州刺史表衛
據淮南繇乃移居曲阿遣兵拒術加揚州牧振

武將軍及孫策東渡遂保豫章時中國喪亂士
友多南奔繇攜接收養與同優劇甚得名稱

劉優

零陵人其父綽本彭城人為零陵太守因徙家
馬優少有雋聲舉孝廉獻帝時為侍御史遷御

史大夫再遷尚書右僕射朝
綱無所不總臺閣為之肅然

劉廙

安衆人兄望為荊州劉表從事以正諫不合投
傳告歸廙遂歸曹操為丞相掾屬轉五官將大

學曹丕器之
著書數十篇

劉淑

與陳蕃竇
武為三君

劉惠

韓馥為冀州牧惠為治中時袁紹起兵以討董卓為名馥謀于眾曰助袁氏乎助董氏乎惠勸

然曰興兵為國安問袁董

劉猛

卿瑯人為尚書令時桓彬與中侍曹節壻馮方同為尚書郎彬素厲志操鄙方不與共酒食會方深怨之遂上章誣以事下尚書令猛雅善彬不舉正其事節大怒劾奏猛以為阿黨請收下詔獄猛意氣自若旬日得出免官禁錮

劉伯麟

漢人舉孝廉除郎中辟司徒掾遷慎縣令卒于官有惠于民其墓銘畧曰忠孝正直高明柔克可以見其為人矣

劉表

字景升山陽高平人魯共王之後初平中為荊州刺史罷取宗賊江南悉平李傕入長安因遣

使奉貢以表為鎮南將軍封成武侯假節鉞以為已援於是威懷兼治萬里肅清關西克豫學士歸者蓋有數千愛民養士從容自保及曹操與袁紹相持於官渡紹遣人求助表不援後操自將征表未至表疽發背而死

三劉楨

字公幹東平人有逸才以文章見重于魏文帝與王粲等號建安七子曹劉為絕唱鍾嶸云若

孔門用詩則公幹升堂子建入室景陽潘陸可坐於廊廡之間

劉巴

字子初優長子劉表辟舉茂才不就漢昭烈定益州諸葛亮薦巴後代法正為尚書令躬履清儉不治產業昭烈嘗曰子初才智絕人亮曰運籌帷幄之中吾不如子初遠矣

劉敏

優孫善草書舉孝廉帝禪時除侍御史糾察名實不枉無辜為楊威將軍魏遣曹爽侵蜀敏率

兵迎敵會費禕至魏軍退以功封雲亭侯後加中書侍郎出入禁掖見者改容拜成都大尹政

化行

劉基

字敬興餘子年十四居絲喪盡禮故吏饋餉皆無所受仕吳官至光祿勳

劉曄

壽春人許邵嘗稱其佐世之才廬江界有山賊守險衆謂不可伐曄以為可卒如所度其他料

敵制勝無不中明帝時進爵東亭侯曄在朝畧不交接或問其故答曰僕在漢為枝葉於魏備腹心寡偶少徒于宜未失也辛謚景侯

劉惔

平原人遭亂避難廬陵事吳孫輔以為軍師建安中孫權在豫章時有星變以問惔惔曰災在

丹陽權曰何如曰客勝主人到某日當得聞是時邊鴻作亂卒如惔言惔善諸術尤明太乙能

推演其事著
書有百餘篇

劉劭

字孔才邯鄲人魏文帝時為尚書散騎侍郎受詔集五經羣書作皇覽拜騎都尉定律令嘗作

趙都賦明帝美之詔作許都洛都賦時外興軍旅內營宮室二賦皆寓諷諫後執經講學賜爵關內侯

劉馥

字元穎為揚州刺史建立州治立學校廣屯田及興陂塘之利子靖遷廬江太守詔曰卿父昔

為彼州今卿復據此
郡可謂克負荷者也

劉宏

字終嘏宏兄粹字統嘏弟演字冲嘏並有名中朝人語曰洛中雅雅有三嘏

劉琰

字威碩有風流善談論侍婢皆能聲樂又悉教誦讀

劉整

合肥守城士諸葛恪圍合肥整為賊所得考問所傳語整曰諸葛公欲活汝汝可具服整罵曰

死狗此何言也我當必死為魏國
鬼不苟活遂汝去也終無他辭

劉綱

字伯經下邳人初居四明山及為上虞令慕漢
葉令王喬乃受道於白君飄然有遠舉之意

劉謚

曰蜀漢北地王謚以後主將從譙周降魏之策怒
曰若理窮力屈禍敗必及便當父子君臣背城
一戰同死社稷以見先帝可也後主不納遂送

璽綬是日謚哭於昭烈之廟先殺妻子而後自
殺左右無不
為涕泣者

劉琨

字越石少得雋朗名初與祖逖俱為司州主簿
同寢中夜聞雞鳴逖蹴琨覺曰此非惡聲也皆

起舞後聞逖被甲與親故書曰吾枕戈待旦志
梟叛逆常恐祖生先我著鞭在晉陽為騎兵所
圍琨乘月登樓清嘯中夜奏茄敵人有懷土之
思弃園去永嘉初都督并幽冀三州事凡璽字

慶孫京師語曰洛中夾夾慶孫越石

晉

劉沉

薊人博學好古仕至侍中在位敦儒道愛賢能嘗薦用里人霍原及申理張華為時所稱重

劉恢

字真長沛國相人祖宏恢少清遠家貧晏如王導深器之累遷丹陽尹為政清整性好老莊卒

於官孫綽誄云居官無官官之事處事無事事之心時以為名言

劉伶

字伯倫沛國人容貌甚陋放情肆志常以納宇宙齊萬物為心不妄交游與阮籍嵇康相遇欣

然神解性尤嗜酒嘗著酒德頌仕東晉為建威將軍

劉洪

字和季沛國相人也大安中張昌作亂轉使持節南蠻校尉荊州刺史討昌斬之悉降其衆時

荊郡守宰多缺洪請補選帝從之洪乃叙功遷德隨才補授甚為論者所稱勸課農桑寬刑省

賦歲用有年百姓
愛悅惠政多著

劉毅

字希樂沛人曾祖距廣陵相叔父鎮左光祿大
夫毅少有大志性剛猛沉斷與劉裕何無忌起

義兵破桓玄累功封南平郡公復加都督荆寧
秦雍諸軍事開府儀同三司荊州刺史持節毅
如故初桓玄于南州起齋號蟠龍毅少時字也
至是遂居之後與裕不相推伏裕以其貳已攻
之為王鎮惡所
襲毅自經死

劉弘

沛人有幹畧政事之才與武帝少共硯席以舊
恩起家累官鎮南大將軍都督荊州諸軍事弘

每有興廢手書守相丁寧致密人皆感
悅咸曰得劉公一紙書賢於十部從事

劉訥

字令聲彭城人有人倫識鑒初入洛見諸名士
歎曰王夷甫太鮮明樂彥輔我所敬張茂先我

所不解周弘武巧於用短杜方叔拙於用長訥官至司隸校尉

劉隗

字大連訥之姪少有文翰避亂渡江元帝以為從事中郎及王敦作亂隗都督青徐入見與刀

協奏誅王氏帝不從遂奔石勒孫波初仕石李龍及季龍死遂南歸穆帝以為襄城太守累遷

散騎常侍

劉疇

字王喬訥之子善談明理永嘉中位至司徒左長史為閹閹所害其後王導拜司徒嘆曰劉君

若過江我不獨拜公也其為人所推服如此

劉邁

字伯羣毅之兄有才幹為殷仲堪中兵參軍後為竟陵太守劉毅劉裕同謀起義兵討桓玄邁

將應之事泄為玄所害

劉牢之

字道堅彭城人漢元王交之後面紫赤色鬚目驚人而沉毅多計畫太元初謝玄鎮廣陵

以牢之為參軍領精銳為前鋒百戰百勝號北府兵敵人畏之復為龍驤將軍領江州事遷會稽太守與敬宣謀襲

桓玄猶豫不決而死

劉頌

字子雅廣陵人咸寧中守廷尉時尚書令史彪寅非罪下獄詔使考竟頌執據無罪寅遂得免

在職六年號為詳平時以比張釋之元康中為尚書加光祿大夫卒謚貞

劉殷

字長盛新興人曾祖母王氏盛冬思董食殷方九歲往澤中慟哭董忽生得斛餘而歸又嘗夢

人謂西籬下有粟掘之果得粟十五鍾鄉人異之

劉喬

南陽人仕為秘書郎遷太子洗馬拜尚書令累遷御史中丞以功封安眾男

子耽光祿大夫耽子
柳尚書左右僕射

劉元海

冒頓之後幼好學師事上黨崔游習毛詩京氏易馬氏尚書尤好春秋左氏傳孫吳兵法

畧皆誦之史漢諸子無不綜覽嘗謂同門生朱紀范隆曰吾每觀書傳常鄙隨陸無武絳灌無大道由人弘一物之不知者固君子之所耻也

劉寔

字子真高唐人好學博通今古以世多進趨廉遜道缺乃著崇讓論以矯之元康間累官至太傅以病免尋徵授太尉詔以列侯就第賜几杖不朝卒年九十一

劉翼

淮陵人永昌之亂翼為衛陽太守起兵期復晉祚力戰死之

劉智

字子房寔之弟素有兄風少貧窶每負薪自給讀誦不輟仕為潁川太守累遷至尚書太常著

喪服釋疑論多
所辯明卒謚成

劉毅

字仲雄掖人幼有孝行厲清節太康初為司隸校尉糾正豪右京師肅然武帝嘗問朕可方漢

何帝對曰桓帝帝曰吾雖不德以桓帝方之不亦甚乎毅曰桓帝賣官錢入官庫陛下賣官錢

入私門以此言之殆不如也帝笑曰桓帝不聞此言今朕有直臣固不同也累遷尚書左僕射

劉暉

穀子正直有父風累遷侍御史武庫火尚書郭彰率人自衛而不救火暉詰之彰曰吾能截君

角暉勃然曰君何敢寵恃作威福天子法冠而欲截其法角乎彰伏不敢言後為左丞正色立

朝三臺
清肅

劉敏元

字道光北海人勵已修學好星厯陰陽術數永嘉之亂同郡管平以年老從敏元西奔為

盜所劫敏元謂賊曰此公餘年無幾願以身代
盜長欲舍之內一賊弗聽敏元奮劍前曰吾豈
望生耶願為諸君除此人盜長遽止之相謂曰
義士也俱免之後仕劉曜為中書侍郎太尉長
史

劉而

字長魚高密人希古篤學勵行與城陽郗都並
有高名咸康中成帝博求異行之士徵拜為博
士
鮪赴京師自陳
年老不拜以壽終

劉脩

字承脩掖人美容善交時豪舉賢良辟司空
掾並不就避亂依冀州刺史卽續續欲降石勒
脩持不可令歸瑯琊王即晉元帝也帝
賢脩命為丞相參軍累遷江州刺史

劉超

字世輔臨沂人元帝時為舍人處身清苦每賜
典皆固辭後拜中書侍郎右衛將軍蘇峻謀逆

還帝於石頭超步侍左右雖幽厄中猶啟授孝
經論語未幾為峻所害峻平追贈衛尉諡曰忠

劉卞

東平人少為縣吏入太學試經為臺四品史訪
問令寫黃紙一鹿車卞曰劉卞非為人寫黃紙
者也或謂卞曰君才簡畧堪大不堪小不
如作守舍人卞從其言後累遷并州刺史

劉遴

字遺民一字子驥晉末作柴桑令人多以柴
桑翁為淵明不知遺民嘗作此令也慕遠公
名德白首同社時以陶淵明
周續之劉遴之為潯陽三隱

南
劉瓛

字子珪宋沛郡相人懷六世孫篤志好學五歲
時聞舅氏讀管寧傳欣然聽之曰此可及也兄

弟二人共處蓬室怡然自樂聚徒教
授不廢素餐嘉其清德薦為秘書郎

劉璉

字子敬璉弟方毅正直宋泰豫中為明帝挽郎
璉嘗夜隔壁呼之璉下牀著衣立方應璉怪其

久日向來帶未竟其立操如此

劉敬宣

字萬壽牢之子八歲喪母悲泣不自勝或謂牢之曰此兒非惟家之孝子必為國之忠臣

也仕宋官至右軍將軍後遇害

劉孝孫

彭城人博學通敏仕多不遂常嘆曰古人或開一說而至卿相立談間而降白璧書籍妄

耳

劉勔

字伯猷彭城人家貧仕宋初為廣州增城令吏幹精通民吏誓服刺史劉道錫引為揚烈府主簿

稍遷綏遠太守元嘉末蕭簡據廣州為亂勔起義兵討之簡平刺史宗慈又命為軍府主簿

鬱林太守以功封大亭侯員外散騎侍郎復拜廣州刺史方討殷琰於豫州不克拜勔著聲南

土廣人思之元徽中桂陽王休範作亂勳與戰死之事平贈司空謚曰昭

劉休賓

字處幹北海都人少好學有文才仕宋為兗州刺史娶崔邪利之女生子文曄邪利之降

文曄母子俱入魏及慕容白曜軍至休賓不降白曜請崔氏與文曄巡視城下文曄哭泣且以爪髮為信遂降及立平齊郡以休賓為懷寧令卒孝文帝幸方山文曄求見申父功厚賞屈於是賜爵都昌子拜協律郎卒謚之曰貞

劉兆

東平人宋時辟公府三徵博士皆不就安貧樂道潛心著述作春秋調人等書百萬餘言

劉穆之

字道和莒人徙居京口從宋武帝平建鄴諸大處分倉卒立定累加尚書左僕射帝北伐

留守建鄴內總朝政外供軍旅決斷如流事無壅滯後以佐命元勳追封南康郡公謚文宣孫

瑀仕至御史中丞

劉湛

涇陽人博學史傳自比管葛不為文章不喜談議仕劉宋為廬陵王義真長史時居武帝憂義真以醵酒進湛曰既不能以禮自處又不能以禮處人後遷侍中太子詹事湛負才氣嘗慕汲黯為人因

名其子黯

劉凝之

字隱安南郡枝江人劉宋時隱居不仕時年錢衡陽王義季慮其餒斃餉錢十萬凝之大喜將錢至市門觀有餓色者悉分與之俄頃而盡

劉懷珍

字道玉平原人漢膠東王後也初隨江夏王劉義恭為墨曹參軍明帝召還為輔國將軍封父縣侯出補竟陵太守建平王景壽為荊州仍徙右軍司馬南郡太守沈攸之寓荆南懷珍

曰攸之矜踪處加楚服阻兵中流聲劫幼主乃遣子靈哲領兵衛京師攸之遣許天保來說懷珍斬之及攸之圍郢城懷珍復令建寧太守張謨遊擊將軍裴仲穆破之進平南將軍卒謚曰敬

劉粹

字道中沛郡蕭人也少有志幹初為州從事高祖克京城參建武軍事從平京邑轉參鎮軍事

尋加建武將軍從征廣固戰功居多轉游擊將軍遷建威將軍江夏相衛將軍穀粹族兄也粹盡心高祖不與穀同高祖欲謀穀眾並疑粹在夏口高祖愈信之及大軍至粹竭其誠力事平封潯縣男

劉義季

幼而夷簡無鄙近之累太祖為荊州高祖使隨性江陵由是特為太祖所愛元嘉元年封

衛陽王食邑五千戶五年為征虜將軍十六年
代臨川王義慶都督荆湘雍益梁寧南北秦八
州諸軍事安西將軍
荊州刺史持節如故

劉秀之

字道實東莞莒人少孤貧有志操十許歲時
與諸兒戲於前渚忽有大地來勢甚顯猛莫

不顧沛驚呼秀之獨不動眾並異焉東海何承
天雅相知器以女妻之兄欽之為朱齡石右軍
參軍隨齡石敗沒秀之哀感不歡宴者十年景
平二年除駙馬都尉奉朝請家貧求為廣陵郡
丞二十五年除督梁南北秦三州諸軍事寧遠
將軍西戎校尉梁南秦二州刺史上以其蒞官
清潔家無餘財賜錢
二十萬布三百疋

劉道規

為荊州刺史恒謙叛道規斬之于枝江破徐
道復有功在州廉慎及歸府庫帷幕儼然如

舊

劉善明

懷珍族弟父懷人仕宋為齊北海二郡太守元嘉末青州饑荒善明家有積粟開倉以救

鄉里百姓呼其家田為續命田刺史劉道隆辟為中從事沈文秀反善明收集門宗部曲奔從懷恭于北海明帝以為北海太守魏克青州母在焉乃布衣蔬食哀戚如初喪舉北平田惠紹使魏贖母還後事齊高帝為心腹功臣代明帝為淮南宣城二郡太守封新淦伯卒謚曰烈

劉鍾

字世之彭城人少貧賤依鄉人中山太守劉回共居有志慷慨從宋高祖伐孫恩有功為劉牢

之鎮北參軍督護討盧循斬徐道覆平成都以廣固功封永新縣男

劉虔之

彭城人誕節不營產業輕財好施宋高祖西征司馬休之魯宗之等遣參軍檀道濟朱起

石步騎出襄陽虔之時江夏相率府郎兵聚糧以待道濟等積日不至為宗之子軌所罷戰敗

見殺追贈梁泰二州刺史

劉道產

彭城人太尉諮議參軍簡之子初為輔國參軍無錫令在縣有能名罷父爵晉安侯廣州

羣盜為寇道產誅二十二家宥其餘黨卒謚曰襄

劉懷慎

彭城人少謹慎質直宋振威將軍彭城內史從高祖拒盧循于石頭屢戰克捷加輔國將

軍鎮彭城加徐州刺史為政嚴猛境內震肅子榮祖嘗討盧循有功又大破魏軍於半城封都

鄉侯

劉懷肅

彭城人宋武帝從母兄也家世貧窶躬耕好學初為寧朔府司馬征孫恩屢有功為贊令

後為司馬平江陵封東興縣侯

劉懷慰

字彥泰仕宋為尚書駕部郎父亡持喪不食醯醬冬日不用絮衣養姑弟妹事寡叔母皆

恩義

劉損

字子騫粹之族弟宋元嘉中為吳郡太守至閭門便至泰伯廟時廟室頽毀垣牆不修損愴然曰清塵尚可髣髴衡宇一何摧頽即令修葺卒贈太常

劉鎮之

字仲德粹之族叔衛將軍毅之父也宋時以毅貴顯閒居京口未嘗應召謂毅以必破我

家毅甚畏憚之每還京口未嘗敢以羽儀入鎮之門以左光祿大夫徵不就卒

劉伯龍

粹之同郡宗人少而貧薄及長歷位尚書左丞少府武陵太守貧窶尤甚嘗在家慨然召

左右將營十一之方忽見一鬼在傍撫掌大笑伯龍嘆曰貧窮固有命乃復為鬼所笑也遂止

劉秉

字彥節宋宗室也少有才俊朝野推譽之泰始初尹丹陽時蕭道成專政將圖篡逆秉與袁粲

等謀誅之不克遇害

劉康祖

虔之子便弓馬智力絕人襲封拜員外郎宋孝武為豫州刺史鎮歷陽以康祖為征虜中

兵參軍既被委任折節自修歷南平王鑠安蠻府司馬魏太武親率大衆攻圍汝南文帝遣將救援康祖總統為前驅奮擊破之太武燒營退走遷左軍將軍卒贈益州刺史謚曰壯

劉延孫

道產子居彭城呂縣宋孝武初位侍中封東昌縣侯累遷尚書右僕射除金紫光祿大夫

領太子詹事又出為南徐州刺史復徵為侍中尚書左僕射領護軍延孫病不任拜赴卒贈司

徒給班劍二十人有司
奏謚忠穆詔改為大穆

劉榮祖

懷慎庶長子少好騎射為宋武帝所知及盧
循攻逼京邑時賊乘小艦入淮拔柵武帝宣

令三軍不得輒射賊榮祖不勝憤怒冒禁射之
所中應弦而倒帝益奇焉以戰功參太尉從討

司馬休之上乃解所著鎧授之榮祖陷陣身被
鎗及帝北伐轉鎮西中兵參軍軍大破魏軍於

半城帝大饗將士謂榮祖曰卿以寡剋眾攻無
堅城雖古名將何以過此永初中為輔國將軍

追論半城功賜爵都卿侯榮祖為
人輕財貴義善撫將士卒于官

劉間之

彭城呂人也有知幹為宋武帝所知
歷官至通直常侍太尉諮議參軍

劉謙之

簡之弟少好學撰晉紀二十
卷官至廣州刺史太中大夫

劉虬

字靈預，涇陽人。喬七世孫。徙居江陵。抗節好學，仕為當陽令。罷官歸家。齊建元初，辟為荊州別

駕復徵為國子博士。俱不就。子之遴，之亨，俱為南郡太守。孫廣德，歷河東太守。仲威為中書侍

郎從弟坦，歷官蜀郡太守。

劉執思

渤海人。說詩甚精，少事同郡劉敬和。敬和事同郡程師則，故其鄉曲多為詩者。執思仕齊

為國子博士。

劉之遴

虬長子，字思貞。八歲能屬文。十五舉茂才。明經對策，沈約任昉見而異之。吏部尚書王瞻

嘗候任昉，遇之遴在坐。昉謂瞻曰：「此南陽劉之遴，學優未仕。」水鏡所宜甄擢。即調為太學博士。

劉桃符

九歲喪母，性恭謹。好學，舉孝廉。射策甲科。歷辟職累遷中書舍人。以勤明見知，久不遷職。

宣武謂曰揚子雲為黃門頌歷三世卿居此任始十年不足辭也

劉瑱

字士溫繪之弟也仕齊歷尚書吏部郎義興太守少有行業文藻篆隸丹青並為當世所稱時

有榮陽毛惠遠善畫馬瑱善畫婦人並為當世第一

劉靈哲

字文明齊高帝建元元年位齊郡太守前軍將軍嫡母崔氏及兄子景煥為魏所獲為布

衣不聽樂及父懷珍卒當襲爵靈哲固辭以兄子在魏存亡未測無容越當茅土朝廷義之

劉孝綽

辭藻為後進所宗時重其文每作一篇朝成暮徧好事者咸誦傳寫流聞河朔亭苑柱壁

莫不題之文集數十萬言行於時兄弟及羣從子侄當時有七十人並能屬文近古未之有也

齊武帝時累遷秘書丞

劉悛

字士操與齊武帝同直殿內並為宋明帝所親待後遷安遠護軍武陵內史郡南古江隄久廢

悛修未畢而江水忽至百姓弃役奔走悛親率厲之於是乃立明帝崩後表求奔赴救帶郡還都吏人送者數千萬人悛人人執手係以涕泣百姓感之贈送甚厚

劉顯

字嗣芳嶽族子六歲能誦過秦論仕梁為參軍俄署法曹後沈約引為少傅五官約嘗於坐策

顯十事顯對其九耳

劉霽

字士湮懷慰子十四居父憂性至孝每哭輒嘔血家貧與弟杳歆立志勤學及長博涉多通梁

天監中歷位西昌相海鹽令並以和理稱母卒廬于墓側所著有釋俗語八卷文集十卷

劉德願

彭城人大明初為游擊將軍領石頭戍事後為秦郡太守性麤率頗為孝武所狎侮尤精

御車永光
中為廷尉

劉臧

沛人性方正篤志好學居
家以孝聞仕梁為著作郎

劉逖

彭城人少而聰敏發憤自勵專精讀書有文籍
所未見者終日誦誦或通夜不歸更留心文藻

尤工于詩詠仕齊歷
官黃門侍郎修國史

劉杳

字士深平原人伯懷珍父懷慰皆至顯宦杳博
綜羣書仕梁官至尚書左丞清儉無雜好所著

要雅及高士傳等書及從
叔峻類苑凡一百二十卷

劉勰

字彥和東莞人撰文心雕龍五十篇論古今文
體欲取定於沈約無由自達乃負書候約於車

前狀若貨鬻者約取讀
大重之謂深得文理

劉歆

字士光平原人博學有文與族弟討隱居以山水書籍相娛奉母兄以孝弟稱寢食不離左右

常欲避人世以母老不忍違若草終論以為形之於神逆旅之館耳及其死也神去此館運朽得理也卒人誄其行述謚曰貞節先生

劉潛

字孝儀梁武大同中累遷御史大夫中丞出為臨海太守時政網疎濶百姓多不遵禁孝儀下

車宣下條制勵精綏撫境內翕然風俗大變為人寬厚內行尤篤事寡嫂甚謹家內巨細必先諮決與妻子朝夕供事未嘗失禮時人以此稱之有文集二十卷行于世

劉玄明

有吏能歷山陰建康令政常為天下第一終於司農卿後傳翹又代玄明為山陰令問玄

明曰願以舊政告新令尹答曰我有奇術卿家請所不載臨別當相示既而曰作縣令惟日食

一升飯而莫飲
酒此第一策也

劉侯仁

豫州人白早生殺刺史司馬悅據城南叛悅
息肫走投侯仁賊雖重加購募又嚴其捶撻

侯仁終無漏泄肫遂免禍事寧有司
奏其操行請免府籍叙一小縣詔可

劉係宗

丹陽人為劉宋竟陵王誕子景粹侍書誕反
廣陵宋世祖起鎮北將軍沈慶之討之誕伏

誅詔殺城中男特赦係宗以為東宮侍書歷官
右軍將軍淮陵太守兼中書通事舍人永明四

年富陽民唐寓之作亂發禁兵東討遣係宗隨
軍慰勞民賴以安齊王欲修白下城難于動役

係宗啟請役在東人丁隨寓之為逆者主從之
後車駕出講武主履行白下城曰劉係宗為國

家得此一城係宗久立朝省聞于職事武帝常
云學士輩不堪經國惟欠讀書耳經國一係宗

足矣沈約王融數百人于事何用其
吏事為時重如此建武二年卒于官

劉覽

字孝智彭城人孺之弟以母憂廬于墓嘗再期
不嘗鹽酪食麥粥而已隆冬止著單布衣家人

慮不勝喪中夜竊置炭于牀下覽因暖得寐及
覺知之號慟歐血梁武帝聞其至性數使省視

服闋除尚書左丞
當官清正無私

劉獻之

少而孤貧雅好詩傳曾受業於渤海程玄後
遂博觀衆籍見名法之言掩卷而笑曰若使

楊墨之流不為此書千載誰知其小也曾謂其
所親曰人之立身雖百行殊途要以德行為首

子若能入孝出弟忠信仁讓不待出戶天下自
知子若不能雖博學多識不過土龍乞雨眩惑

將來其於立身之道有何益乎由是學者高其
行焉孝文幸中山詔徵典內校書獻之喟然歎

曰吾不如莊周散木遠矣一之謂甚其可再乎固以疾辭

劉子孺

字季幼少好文章性又敏速嘗在御坐為李賦受詔便成文不如點梁武帝甚稱賞之後

侍宴壽光殿詔羣臣賦詩時子孺與張率並醉未及成帝取孺手板題戲之曰張率東為美劉孺洛陽才攬筆便應就何事久遲回其見親愛如此遷散騎常侍大同中出為晉陵太守

劉沼

六世祖與為晉驃騎將軍自幼善屬文及長博學決聞位終秣陵令

劉璠

沛人九歲而孤居喪合禮少好讀書兼善文筆隨梁上黃侯蕭曄在淮南璠母在建康適疾璠

弗之知嘗忽一日舉身楚痛尋而家信至云其母病璠即號泣戒道絕而又蘓當身痛之辰即母死之日居喪毀瘠遂成風氣服闋後一年猶杖而起及曄終毘陵故吏多分散璠獨奉曄喪

還都墳成乃退後為周文帝所得以為中外府
記室遷黃門侍郎儀同三司明帝初授內史中
大夫掌綸誥尋封平陽縣子著梁
典三十卷有文集二十卷行于世

劉祥

字休徵瑞之子幼聰慧賓客見者皆號神童事
嫡母以至孝聞十歲能屬文十二通五經仕梁

累遷車騎
大將軍

劉峻

字孝標明慧過人間人有異書必往借之人謂
之書淫博極羣書為任昉之子著廣絕交論大

畧言因五交而生三釁也梁武帝引見占對不
稱乃著辨命論寄其懷遊東陽紫巖山菜室居

馬卒謚玄
靜先生

劉之亨

此次子字嘉會好學美丰姿善占對武帝臨
荊州見此二子帝曰之遴必以文學顯之亨

當以功名著後舉秀才累遷步兵校尉南郡太守有美績

劉瑀

字茂琳位本在何偃前孝武初偃為吏部尚書瑀園侍中不得與偃同從郊祀時偃乘車在前

瑀策駟馬車後相去數十步瑀踞馬及之謂偃曰君營何疾偃曰牛駿馭精所以疾耳偃曰君馬何遲曰騏驎羅於羈絆所以居後偃曰何不著鞭使致千里答曰一蹙自造青雲何至與驚

馬爭路

劉臻

字宣擊顯子年十八為梁東閣祭酒隋高祖初進儀同三司左僕射封饒陽縣伯耽悅經史終

日覃思精於兩漢書時稱為漢聖

劉繪

字士章煖之弟歷位中書郎永明末都下人士盛為文章皆湊景陵王西邸繪為後進領袖時

張融以言辭辨捷周顒彌為清綺而繪音采不
瞻麗雅有風則時語曰三人共宅夾清漳張南

周北劉
中央

劉昭

高唐人晉太尉寔九世孫幼清警通老莊義及
長勤學屬文仕梁卒於剡今集注後漢書一百

八十卷文集十卷子繩亦好學通三禮位尚書
祠部郎遷風流跌宕名高一時為湘東王中錄
事

劉諒

字求信尤悉晉代故
事號曰皮裏晉書

劉苞

字孝嘗悅弟之子梁初累遷太子洗馬以文藻
見知多預宴坐受詔詠天泉池荷及採菱調下

筆即
成

劉翽

京兆人官建州因家焉居官廉明為政慈惠或收冠或決獄或賑貧或拯難居人無數事義心

仁翽所至人則曰活我劉公至也其後孫領收峒寇有功謚忠簡孫純收卻寇賜廟封忠烈從

孫幹謚忠顯幹子羽謚忠定子羽子珙謚忠肅世號五忠劉氏

劉休

字弘明相人多藝能尤精占筮宋孝武帝時為駙馬都尉襲祖爵南鄉侯齊建元初為御史中

丞出為豫章內史

劉訐

字彥度梁人與阮孝緒劉歆為三隱卜築鍾山有終焉之志孝標嘗與東云訐起凡越俗如半

天朱霞散矯矯出塵如雲中白鶴皆歎歲之梁稷寒年之纖纈嘗着穀皮冠被衲衣遊山澤風

神穎俊意氣彌遠遇者以為神人

劉亮

中山人本名道德侗儻有計畧仕西魏以都督從征西有功封廣興縣子屢謀陳策宇文泰曰

卿文武兼資孤之孔明也乃賜名亮卒贈太尉謚曰襄

劉芳

字伯友彭城人處窮窘而業尚專固聰敏過人篤志墳典晝則傭書以自給夜則窮經不寢著

窮通論以自慰仕魏累遷中書令所撰述凡十有六書

劉渢

南陽人父紹中書郎渢事後母至孝雖極捶楚孝不衰母亦感悟慈愛遂隆友愛弟渢仕元魏

為遙光諮議求出為丹陽丞及遙光敗渢曰吾為人作吏不避死弟渢曰吾何忍獨生俱見殺

劉雄

周臨洮子城人少有大志為宇文泰親信拜中大夫泰重其才謂曰古之人富貴不歸故鄉如

衣錦夜行以雄為河州刺史鄉里榮之

劉晝

字孔昭受學無倦常閉戶讀書暑月唯着犢鼻褌晝夜不息舉秀才不第乃學屬文言甚古拙

制賦以六合為名呈魏收而不拜收忿之謂曰賦名六合已是大愚文又愚於六合居四體又

愚於文晝不忿又示邢子才子才曰君此賦正似疥駱駝伏而無斌媚

劉蘭

武邑人年三十餘始受學中山王保安三年後遂以儒學名聚徒二百人蘭長於左氏兼通諸

經先是張吾貴解說不舉先儒之旨惟蘭推經傳參以緯候講說精悉又明陰陽博物故為儒

者所宗

劉懌

字祖欣芳之長子有父風頗好文翰仕魏歷徐州別駕兗州左軍府長史司空諮議參軍屢為

行臺出使所歷皆有當官之稱轉通直散騎常侍徐州大中正行鄆州事尋遷安南將軍大司

欽定四庫全書

萬姓統譜
卷五十八

二十五

農卿卒贈徐州
刺史謚曰簡

劉廐

字景興芳之次子魏靈太后臨朝稍遷光祿大夫孝武帝初除散騎常侍驃騎大將軍國子祭

酒尋兼都官尚書又兼殿中尚書廐弟穢位金紫光祿大夫穢子述有文藻頗工詩賦仕北齊官至儀同三司

劉隲

字子升廐之子少有風氣頗涉文史仕魏為徐州開府從事中郎轉中書舍人屬梁通和隲前

後受勅對其使一十六人為司徒左長史卒贈南青州刺史

劉慤

字仲華芳之從子聰敏好學博綜經史善草隸書識奇字魏宣武初入朝位尚書外兵部郎中

芳甚重之凡所撰定朝廷軌儀皆與參量尚書博議慤與廐中郎袁翻常為議主達於從政臺

中疑事咸所訪決遷步兵校尉孝明初大軍攻
陝右懋為李平行臺郎中城拔懋頗有功遷太
尉司馬卒家甚清貧亡之日徒四壁而已當時
才雋莫不痛惜之贈持節前將軍謚曰宣簡所
著作之文見稱於時又撰諸器物
造作之始十五卷名之曰物祖

劉渴

侯京性剛烈魏太和中為徐州後軍以力死戰
衆寡不敵遂被擒瞋目大罵終不降屈為賊所
殺贈立忠將軍平
州刺史上庸侯

隋

劉炫

字光伯河間人眸子精明視日不眩閉戶讀書
十年不出開皇中奉勅與上飭同修國史俄直
門下省以待顧問煬帝時又修律
令後歸鄉里以教授為業終于家

劉善經

河間人博物洽聞尤善詞筆歷著作郎太子
舍人著酬德傳三十卷諸劉譜三十卷四聲

欽定四庫全書

卷五十八

指歸
一卷

劉子翼

字小晉陵人仕為著作郎唐貞觀中召之辭以母老詔許終養江南巡察使表其所居

為孝
慈堂

劉行本

沛人性剛有不可奪之志徵拜諫議大夫檢校治書侍御史高祖嘗答一郎于殿前以行

本諫而止後領大興令權貴
憚其方直無敢至其門者

劉士雋

彭城人性至孝丁母喪廬于墓側負土成墳虎狼馴擾為之取食文帝旌表其門

劉子翊

彭城人性剛嘗有吏幹仁壽中為新豐令有能名大業中為治書侍御史從幸江都以切

諫忤旨為丹陽留守煬帝遇弒羣賊執子翊至臨川城下使告城中云帝已崩子翊反其言遂

見害

劉祐

榮陽人開皇初為大都督封索盧縣公其所占候如合符節嘗奉詔撰兵書十卷名同金韜後

又著陰策觀臺飛
候玄象要記等書

劉弘

字仲遠彭城人少好學有行檢重節槩隋平陳以功加上儀同拜泉州刺史會高智慈作亂弘

堅守百餘日賊知其饑欲降之弘抗節彌勵比城陷為所害上嘉歎久之官其子

劉權

字世畧沛郡豐人少有俠氣後折節好學動循矩度開皇中以車騎將軍領鄉兵從晉王廣平

陳進開府儀同三司宋國公拜蘇州刺史以誠信御下民不忍欺煬帝初拜衛尉卿改南海太

守路達盜起權為詔諭盜悉降
附帝聞而嘉之抵任有異政

劉方

京兆人性剛決有膽氣初仕後周以戰功拜上儀同後事隋文帝進爵為公仁壽中為交州道

行軍總管討平獯人汙其宮室剋石記功而還

劉穀

彭城人時庾季才為信義好賓遊常言日良辰與瑯琊王褒河東裴政宗人信等為文酒之會穀亦預焉

劉焯

字士元昌臺人少與劉炫結友俱以儒學知名世稱二劉天下名儒後進質疑受業不遠千里而至博學通儒近代無出其右

劉悻

昌平人初為范陽裨將積功至雄武軍使廣墜田節用度以辦治稱遷涿州刺史得衆心擢御史中丞封彭城郡公卒謚曰恭

唐劉林甫

魏州人武德時為內史舍人典機密以才稱與蕭瑀等撰定律令著律義萬餘言歷中書

吏部侍郎賜平縣男唐沿隋制林甫諫請四時聽選隨到輒擬於是官無滯人時天下初定州

府及詔使以赤牒授官至是罷悉集吏部調至萬貲林甫隨材銓錄咸以為宜

劉文靖

武功人個儻有大志隋末為晉陽令與唐太宗謀起義高祖初授民部尚書

劉藏器

延祐從弟高祖時為侍御史衛尉卿尉遲寶琳魯人為妾藏器劾還之寶琳私請帝止其

還藏器曰法為天下懸衡陛下用舍由情法何所施乃詔可後出為宋州司馬

劉延祐

彭城人舉進士補渭南尉吏治第一李勣戒之曰子年少而有美名宜少自抑無為出人

上官至井州刺史安南都護

劉德威

彭城人姿貌魁秀有幹畧貞觀初歷大理卿太宗問比刑網太密其答安在德威曰在君

不在臣下之寬猛視主之好惡帝深然之官至刑部尚書

劉審禮

彭城人德威子德威仕至大理卿所得俸祿以分宗親無留藏及審禮為人尤孝謹少喪

母為祖母元所養元每疾病必親煮藥嘗而進元曰兒孝通幽顯吾一顧念疾輒問貞觀中歷左驍衛郎將事繼母尤謹與弟延景為間友得祿而資之弟亦甚恭焉而妻子執寒苦晏如也再從皆得同居合二百口內外無間言當時號孝義劉家

劉政會

隸高祖麾下累功封邢國公貞觀初轉洪州

都督卒太宗手詔政會昔預義舉為殊功葬宜異等于是贈民部尚書謚曰襄子元意張爵

劉君良

瀛州人四世同居門內斗粟尺帛無所私隋末荒饑妻以計勸之異居君良因斥去召兄

弟復同居天下亂鄉人共依之衆築為堡號義成堡其家六院同一庖子孫皆有禮節貞觀中

旌其門

劉洎

字思道江陵人貞觀中為治書侍御史拜尚書右丞勤于職務太子初立洎上言謂宜尊重道

帝敕洎與岑文本馬周日直東宮稍遷侍中帝忽謂羣臣曰朕今欲聞已過卿等為朕言之洎曰頃上書有不稱旨或面窮詰恐非所以進言者路帝曰卿言善朕能改之

劉感

鳳泉人武德初以驃騎將軍戍涇州為薛仁果所圍執感令約城降感給諾至城下大呼曰賊

大饑亡在旦暮秦王兵且至仁果怒埋感半身土中馳射之死罵亦甚賊平高祖追封平原郡

公命其
子龍爵

劉禕之

晉陵人父子翼為著作郎禕之能文辭累遷弘文館學士高宗嘗與參決時政以分宰相

權時謂北門學士後以言忤武
后賜死于家睿宗立贈中書令

劉伯英

永徽中為桂州都督時竇義二州蠻賊寇邊伯英率眾攻之民賴以安

劉祥道

字同壽觀城人父林甫武德時為內史舍人典機密撰定律令著律議萬餘言高宗時拜

右相進爵廣平
郡公謚曰宣

劉齊賢

祥道子龍爵錄侍御史出為晉州司馬以方直為帝所尊憚時將軍史興宗獵苑中言晉

州出佳鷄可捕取帝曰齊賢豈捕鷄之人耶累遷黃門侍郎修國史進同中書門下平章事武

后時代裴炎為侍中辨炎不反武后怒左遷晉州刺史貶吉州長史永昌中為酷吏所陷自經

於獄贈太子太保

劉幽求

武強人聖歷中舉制科為朝邑尉初桓彥範等誅二張而不殺武三思幽求謂曰公等無

葬地矣已而果然後官至尚書右僕射同中書三品

劉行舉

盱眙人徐敬業起兵揚州行舉與楚州刺史李崇福連和嬰城不從敬業敗拜游擊將軍

劉真

武宗朝為磁州刺史與胡果等為九老會

劉延嗣

武后時為潤州司馬徐敬業攻潤州延嗣以刺史固守俄而城陷敬業邀以降延嗣曰吾

世蒙恩今城不守所負多矣詎能苟生為宗族羞敬業怒將斬之其黨魏思溫救止繫江都獄

劉濛

字仁澤晏曾孫舉進士累官度支郎中會昌初
推給事中為宰相李德裕所知時欲建經畧河

湟濛按邊調兵械糧餉宣宗立德
裕得罪濛貶朗州刺史終大理卿

劉巨麟

廣州都督州山峻水深民不
井汲巨麟始鑿井四民便之

劉禹錫

字夢得中山人擢進士登博學宏詞科工文
章累官至集賢直學士出為蘓州刺史以政

最賜金紫服遷太子賓客晚年
以文章自適白居易推為詩豪

劉敬和

高苑縣令嘗令淄川高山鄒平皆有聲至高
苑適歲饑即擅開倉賑民民歌曰高苑之樹

枯已榮淄川之水潭已澄鄒邑之
民仆已行述其德政樹碑於縣治

劉知幾

字子玄藏器子博覽羣書善文辭舉進士累
遷鳳閣舍人修國史著史通內外四十九篇

徐堅嘆曰為史氏者宜置此座右也開元初遷左散騎常侍兄知柔累官太子賓客封彭城侯

卒謚

曰文

劉晏

字士安曹州人玄宗封泰山晏八歲獻頌帝奇其幼即授太子正字累遷京兆尹總大體不苟

代宗立拜相領常平使理財甚有績
初後為楊炎所誣賜死天下以為冤

劉允濟

韋人少孤事母孝工文辭與王勃齊名舉進士累遷左史直弘文館為著作佐郎修國史

遷鳳閣舍人壽州刺史以清白稱入為修文館學士

劉易從

德威次子累遷彭城長史永昌中為酷吏周興誣以死罪將刑百姓奔走爭解衣投地曰

為長吏祈福有司
平直乃十萬餘言

劉昌

開封人善騎射天寶末從張介然討安祿山累以戰守功官至檢校尚書右僕射南川郡王在

邊最久所至率士墾田而軍有羨食邊障安寧卒贈司空

劉餗

字鼎卿歷集賢院學士兼知史官終右補闕父子三人更蒞史官著史例頗有法

劉太真

宣城人天寶中舉進士官至刑部侍郎德宗宴曲江為詩羣臣皆和第太真詩為首

劉迅

字捷卿歷京兆功曹叅軍事嘗寢疾房瑄聞憂不寐曰捷卿有不諱天理欺矣陳郡殷寅名知

人見迅嘆曰今黃叔度也劉晏每聞其論曰皇王之道盡矣

劉長卿

字文房河間人開元進士正德中為監察御史以檢校祠部員外郎為轉運使判官知淮

西鄂岳轉運留後有集十卷行于世

劉業

字漢藩句容人父三復為浙西觀察使李德裕掌書記業六七歲能屬文德裕嘉之使與子共

學後為翰林學士傷德裕以朋黨抱誣死上疏伸其寃復官爵世高其義

劉海賓

彭城人以義俠聞為涇原兵馬累立戰功劉文喜叛攻海賓子光國擊斬之封海賓樂平

郡王太子太保

劉軻

沛人流離邠相至韶家馬博學無所不通遊長安為馬植所奇遂登第歷官侍御史所著有春

秋指要翼孟子諸書數十卷據言稱其文章與韓柳齊名

劉廷珍

彭城人以羽林軍扈德宗奉天屢立戰功官左驍騎大將軍封東陽郡王子沔遷大將軍

擢涇原節度使亦累戰功進金紫光祿大夫賜子一官

劉商

字子夏彭城人第進士歷尚書虞部郎中免所著有劉虞部集十卷

劉仁師

彭城人長慶中為陵令有惠政民為立遺愛碑遷屯田郎中兼侍御史劉禹錫稱其理人

為循吏理財為能臣一出於清白故也

劉暹

字士昭曹州南華人汾水刺史天資疾惡所至以方直為觀察使所畏建中末召為御史大夫

宰相盧杞憚其嚴更薦前河南尹子頤代之暹終潮州刺史

劉玄佐

滑州匡城人少倜儻不自業亡命從永平軍稍為牙將李靈擢據汴州及玄佐罷取宋州

詔以州還隸其軍節度使李勉表署刺史德宗建中初宋毫節度李納叛李洧以徐州歸納急攻之詔玄佐援洧大破納兵斬首萬餘級進圍濮州徇濮陽皆下降其守遷兵部尚書希烈攻

陳州立佐救之希烈走遂進取汴州詔加汴宋節度使陳州諸軍行營都統立佐本名洽由是賜名以褒寵之

劉仁安

上蔡人仕為潮州刺史因家嶺表生子謙累官封州刺史謙生隱唐末為留後梁開平初

兼靜海軍節度使封南海王

劉迺

伊闕人少穎悟誦六經日數千言善文詞為時所推德宗幸奉天迺臥疾私第朱泚遣人召之

固稱疾篤聞車駕幸梁州自投于牀下搏膺呼天不食卒諡曰忠惠

劉沔

字子汪廷珍子少孤客振武節度使范希朝署牙將希朝奇之召謂曰後日必處吾坐希朝卒

入為神策將遷大將軍擢涇原節度使進檢校尚書左僕射累立戰功又進金紫光祿大夫賜

一子官

劉义

少任俠晚折節讀書聞韓愈接天下士徒步歸之作雪車冰柱二詩出盧仝孟郊之右因持愈

白金數斤而去曰此諛墓中
人所得不若與劉君為壽

劉弘敬

字元溥彭城人資財巨萬修德不耀人莫知之家雖富利人之財不及怨施人之惠不望

報長慶初有善相者曰不久天期且至弘敬曰
壽夭天也先生其奈我何相者曰夫相不及德

德不及度量君雖不壽而德且厚於度量又寬
夫一德可以消百邪猶享厚祿而况壽乎後有

女將適人抵維揚求女奴資行用錢八十萬得
四人焉內一人名蘭孫者風骨恣態殊不類賤

乃名家子也弘敬曰此女衣冠之後不可婢使
乃備裝資先女嫁之是夜夢一人曰我蘭孫父

荷君嫁女無以報今告天延君壽二十四年後過一年相者復至曰相君面可延二紀行何陰德而至此弘敬曰無他不忍以貴為賤嫁一婢耳後果延二紀而終

劉棲楚

鎮州人累官右拾遺嘗諫敬宗遊畋以額叩龍墀血被面帝為動容復推諫議大夫

劉蕡

字去華昌平人明春秋能言古今興亡事擢進士第文宗時應賢良方正對策專論親近嬖倖

言極切直遂被黜後昭宗因羅衮上言贈蕡右諫議大夫

劉仁軌

尉氏人家貧好讀書每晝地書空以寓所習卒以通博聞仕為陳倉尉累遷尚書左僕射

五世孫瑒舉進士擢翰林院學士宣宗時累遷同平章事

劉瑒

字子全擢翰林學士時宣宗始復關隴裁處叢繁詔書下捉筆遽成辭皆允切

劉潼

字子固，暹之孫。舉進士，累官祠部郎中。大中初，討党項羌軍，乏食，宰相欲以潼為供軍使，會復

河湟，以潼為河湟供軍使。按歷京兆、山南，有劇賊詔潼馳往論，什之潼挺身直叩其壘，曰：「有詔赦

爾罪，盜皆列拜。」約潼就館而降，擢四川節度使，加右僕射，卒，贈司空。

劉瞻

字幾之，桂陽人。舉進士，博學宏詞，歷官翰林學士、中書平章事，以同昌公主薨，逮繫醫百餘人。

瞻固爭罷為荆南節度使，僖宗立，復拜中書侍郎，為人鯁直，庶約俸餘濟親舊之貧者，家無餘儲。

劉崇望

政會七世孫。舉進士，累官劍南節度使，遷兵部尚書，兄崇龜官至清海軍節度使，並有才

名

劉巨容

徐州人為州大將龐勦之反自拔歸授埭橋鎮遏使浙西突陣將王郢反攻明州巨容以

簡箭射郢死拜明州刺史徙楚州團練使黃巢亂江淮授蘄黃招討副使徙襄州行軍司馬檢

校右散騎常侍累立戰功遷檢校禮部尚書復授南面行營招討使累兼天下兵馬先鋒開道

供軍糧料使檢校司空封彭城縣侯

劉隱

封州人祖仁安本上蔡人仕為潮州刺史父譙又為封州刺史因家焉諫卒隱代領其任唐末

多故隱立功嶺南遂據有南海梁封為南海王隱卒弟陟龍位遂稱帝傳至鋹為宋所取

五代劉仁瞻

彭城人南唐時清淮節度鎮壽州周師圍城仁瞻望守不下副使孫羽詐以城降仁瞻死

之世宗遂徙城下蔡而復其軍曰吾以旌仁瞻之節也

劉岳

洛陽人唐民部尚書政會八代孫敏于文詞舉進士仕梁為翰林學士後唐明宗時為吏部侍郎

郎遷太常卿

劉贊

魏州人始就學其父自肉食而以蔬食食贊曰爾欲之則勤學以干祿由是贊力學後唐明宗

時為御史中丞刑部侍郎守官以法權豪不敢干以私

劉知俊

字希賢徐州沛人從梁太祖以為左開道指揮使資穀雄傑勇出諸將歷海淮鄭三州刺史

以功表匡國軍節度使拜行營招討使加檢校太尉兼侍中封大彭郡王

劉詞

字好謙大名元城人也少時楊師厚以勇悍知名唐莊宗下魏博與梁戰夾河詞以軍功遷長

劍指揮使累遷沁州團練使徙房州歲餘為政不苛撓人頗便之暇日常被甲枕戈而臥謂人

曰我以此取富貴豈可一日輒忘之且人情易習若一情其筋力有事何以報國漢高祖以功并鎮國軍節度使周太祖入立如同中書門下平章事

劉崇俊

山陽人祖全父仁規相繼為濠州刺史有能名崇俊仕南唐亦為濠州刺史有仁惠南唐

陞濠州亦為定遠軍就以崇俊為節度使移壽州卒贈太尉諡曰威

劉昭禹

金華人為詩刻苦嘗自云句向夜深得心從天外歸後仕湖南為天策府學士嚴州刺史

有詩三百篇

劉茂忠

安福人貌魁雄善用大稍事南唐以功授吉州兵馬監押累遷袁州刺史宋平江南茂忠

至京太祖問汝在江南屢援邊邑何也對曰臣結髮事主惟忠勇是奮雖使陛下親征臣亦殞

身不顧太
祖壯之

劉昌

嗣昌 湘鄉人漢時為磁相二州刺史漢隱帝遇害

周行逢逼以偽祿昌嗣曰吾嘗致身漢氏縱不
能夷齊獨不可效梅福乎乃改姓范號愚叟躬

耕給饘粥
以終身焉

劉審交

字求益幽州人仕晉為三司使時有議者請
檢天下民田以益租審交曰租有定額天下

比年無閒田遂止民賴以不擾尋遷陳州防禦
使視民耕器薄陋乃取河北耕器為範為民更

鑄之

萬姓統譜卷五十八